

# **A Wakak a Warwara oe Iesu Karisito e Jon i tumusi**

## *A warwara talapor nigo*

E Jon ning a halin ning a bonot pa pisir naur a kakak a asaer ane Iesu (oroï e Matiu 4:21). I oroï a ututnala ning e Iesu i toli pa i longor anuna asaerla. I tumus a buk ne lamur tana natol a buk ning e Matiu, Mak pa e Luk ditol tumusi. I tumus a buk ne anasa i mang sur dalar tasman e Iesu pa dalar tortorot onoi, pa dalar tasman lalani mang oe Iesu ka dalar laun tikin. Oroï e Jon 20:31.

Ning a tnan utna ning e Jon i mang sur ir atai dala onoi mange: E Iesu ai e God pa Nat e God. Ana kamkama buk ne i warwara talapor oe Iesu mang i e God pa natnating ot i kes taum oe God. I atai dala otleng ana ututnala na kulkulan ning e Iesu i toli, pa e Jon i atong la mang a akinalangla, anasa la amomoli mang e Iesu i e God. E Jon i atai dala otleng mang a galis a tarai bel la tortorot oe Iesu, a ningnigola anuna tarai Juda otleng bel la tortorot.

## *A tinan ana Buk Jon:*

A Warwara i hanot a barsan (1:1-18)

E Jon a Tena Baptaï (1:19-34)

A ningnigo na kakak a asaerla ane Iesu  
(1:35-51)

A titol ane Iesu tetek a tarai (2:1–12:50)

A ararop a wik pa minat e Iesu (13:1–19:42)  
 A kamkamtur ulak ane Iesu kusun a minat  
 (20:1-31)  
 E Iesu i hanot tetek a kakak a asaerla to e  
 Galili (21:1-25)

*E Iesu ot a Warwara ane God*

<sup>1</sup> Natnating ot ning belot di akes a rakrakan hanua, a Warwara ka kes nigo. A Warwara i kes taum oe God, pa Warwara i ot e God.

<sup>2</sup> Natnating ot i kes taum oe God.

<sup>3</sup> Ana Warwara ot, e God i akes a ututnala rop. Bel ta ngas ulak ning e God i akes la. E God i akes a ututnala rop ana Warwara ka.

<sup>4</sup> A lalaun i kes onoi, pa lalaun ning, i a talapor anuna taraila rop.

<sup>5</sup> A talapor i atalapor ana mormorom, pa mormorom bel i tolsot pasi.

<sup>6</sup> E God i sune sen ning a barsan, a risana e Jon.

<sup>7</sup> I hanot sur ir warwara talapor ana talapor, sur a taraila rop lar tortorot onoi.

<sup>8</sup> I ot bel a talapor, i hanot ka sur ir warwara talapor ana talapor.

<sup>9</sup> Anasa a talapor momol ning ir atalapor a taraila rop, ir hanot ute na rakrakan hanua.

<sup>10</sup> A Warwara i kes te na rakrakan hanua. Ana Warwara e God i akes a rakrakan hanua, ika a taraila te na rakrakan hanua bel la oroi lalani.

<sup>11</sup> I hanot sur anuna taraila, ika anuna taraila ot bel la gas pasi.

<sup>12</sup> Ika, la rop ning la gas pasi, pa la tortorot ana risana, i malmaling pas la sur la na natnat e God.

<sup>13</sup> Bel la na natnat e God anasa di agon la ana mangis a tarai, o ana nuknukin tik mite lapiu, o ana nuknuk a tinaulai. E God ot e tamanla.

<sup>14</sup> A Warwara i hanot a barsan momol, pa i kes potor tamila. Mila ka oroi tar a matatarna, a matatar e Natnalik takai sot ka, ning i han misaot ta e Tamana, i bukus ana marmaris pa momolna.

<sup>15</sup> E Jon i warwara talapor onoi, pa i warwara ana tnan elngena mange, “I ka esaning a warwara nigo tar onoi mang, ‘Esaning ir mur tak, i leklek kol hok, anasa i laun nigo tak.’ ”

<sup>16</sup> I bukus ana marmaris, pa ana nuna tnan marmaris, i sira angisngis dala ana galis a wakak a utna.

<sup>17</sup> Oe Moses, e God i saran tar a warkurai tandala, ika oe Iesu Karisito i saran tar a marmaris pa momolna tetek dala.

<sup>18</sup> Bel tik i oroi tar e God tuk onone. Ika e Natnalik, takai ka, ning i kes ting na ris e Tamana, ka asangan tar e God tetek dala. Pa i ot e God.

*E Jon a Tena Baptais i warwara onoi ot  
(Matiu 3:1-12; Mak 1:1-8; Luk 3:1-18)*

<sup>19</sup> A ningnigola ana tarai Juda la mitisa e Jerusalem, la sune sen a tena artabarla, pa

---

**1:13: 1:13** Jon 3:3-6; Pilipai 2:7; Jon 2:11; 1 Pita 1:23    **1:17: 1:17**  
Kisim Bek 34:28; Rom 6:14    **1:18: 1:18** Kisim Bek 33:20; Jon 6:46;  
1 Timoti 6:16

dingla na tarai tagun a mangis a tarai Liwai,\*  
tetek e Jon sur lar dekeni mang, “U esi?”

<sup>20</sup> E Jon bel i warwara alari, i warwara talapor  
ot onoi mang, “Bel iau a Karisito.”

<sup>21</sup> La deken ulaki mang, “U esi? U e Elaija?” Pa  
i keles la mange, “Bel! Iau bel e Elaija.” La deken  
ulaki mange, “U a propet ning di atongi mang ir  
hanot?” I keles la mang, “Bel.”

<sup>22</sup> Lamur la atai i mange, “U esi? Ur atai mila  
sur milar atai la ning la sune mila ute. Asaning  
ur atongi hom?”

<sup>23</sup> E Jon i keles la mange, “Iau a barsan ning a  
propet Aisaia i warwara nigo onoi mang, ‘A  
elngena mainla i arkabah ting na hanua bel  
mang: Mulor atostos a ngas anuna Leklek.’ ”

### *Aisaia 40:3*

<sup>24</sup> A Parisaiola ning di sune la tetek e Jon,

<sup>25</sup> la dekeni mange, “U atongi mang, bel u a  
Karisito, pa bel otleng u e Elaija, pa bel u a  
propet, ning di atongi mang ir hanot. Ning i  
manglarning, sur asa u baptais a taraila?”

<sup>26</sup> E Jon i keles la mange, “A baptais mulo ana  
malum. Ika takai kaning i tur potor mulo, bel  
mulo tasmani.

<sup>27</sup> Esaning ir mur tak, i leklek tak. Pa bel a  
tolsot sur ar pak sen a inau ana nuna su. A  
natarna kol tana.”

<sup>28</sup> A ututnala ne, la hanot tumo e Betani ting  
na ris a malum Jodan ning e Jon i baptais a  
taraila ano.

---

\* **1:19: 1:19** A mangis a tarai Liwai la sira titol ting na rumai  
artabar. **1:21: 1:21** Lo 18:15, 18; Matiu 11:14 **1:27: 1:27** Jon  
1:15

*E Iesu a Nat a Sipsip ning ir mat sur a toltol laulau anuna taraila*

<sup>29</sup> Ning a pukakiar lamur, e Jon i oroi pas e Iesu i han amon teteki, pa i atongi mange, “Mulo oroi i, a Nat a Sipsip ane God, ning ir kepsen a toltol laulau anuna taraila mite na rakrakan hanua.

<sup>30</sup> A barsan kane, ning a warwara nigo tar ono mange, ‘A barsan ning ir mur tak, i lekkek kol hok, anasa i laun nigo tak.’

<sup>31</sup> Lanigo iau otleng bel a tasmani. Ika a baptais ana malum sur ar apuasa a barsan ne tetek a tarai Israel.”

<sup>32-33</sup> Pa e Jon i warwara talapor mange, “Bel a tasmani esi a Karisito. Ika e God, ning i sune iau sur ar baptais ana malum, i atai iau mang, ‘Ur oroi a Talngan Tabu ir han purum pa ir kes saot na palai ning a barsan. A barsan ning, ir baptais ana Talngan Tabu.’ Pa a oroi a Talngan Tabu i han purum misaot na langit, i arlar ana tabun pa i kes saot oe Iesu.

<sup>34</sup> Ia ka oroi tar a utna ning i hanot, pa a warwara talapor onoi mang, ai a Nat e God.”

*A ningnigo na kakak a asaerla ane Iesu*

<sup>35</sup> Ning a pukakiar lamur, e Jon taum ana naur a kaklik tagun a kakak a asaerla anunai, ditol tur tar ulak tingia.

<sup>36</sup> Ning i oroi e Iesu i bolos ditol, i atongi ono mange, “Oroi, a Nat a Sipsip ane God.”

<sup>37</sup> Ning naur a kaklik a asaer dia longor a warwara ning, dia mur e Iesu.

<sup>38</sup> Ning e Iesu i talingir, i oroi diau ning dia muri, pa i deken diau mange, “Asaning mu mang suri?” Dia kelesi mange, “Rabi” (a kamkamna mang Tena Asaer), “u kes taha?”

<sup>39</sup> E Iesu i keles diau mange, “Mur han ute sur mur oroi.” Pa dia muri, pa dia oroi a pukna ning e Iesu i kes ia. Ning ditol hanot, ka 4 kilok pas pa ditol kes a rah kidol ning tingia.

<sup>40</sup> Ning a halindiau ning dia longor a warwara ane Jon pa dia mur e Iesu, a risana e Endru, a tas e Saimon Pita.

<sup>41</sup> A ningnigo na utna ning e Endru i toli, i seren pas e tasnalik e Saimon, pa i atai i mange, “Mila ka pastetek pas a Mesaia!” (a kamkamna a Karisito<sup>†</sup>).

<sup>42</sup> E Endru i ben e Saimon tetek e Iesu. Ning e Iesu i oroi i, i atai i mange, “U e Saimon, a nat e Jon,<sup>‡</sup> dir atong a risam e Kepas.” (Ana warwara Grik di atongi e Pita, a kamkamna a hat.)

### *E Iesu i kabah pas e Pilip pa e Natanael*

<sup>43</sup> Ning a pukakiar ulak, e Iesu i mang sur ir han utumo e Galili. I pastetek pas e Pilip, pa i atai i mange, “Ur mur iau.”

<sup>44</sup> E Pilip, mitumo e Betsaida, a hanua ane Endru pa e Pita.

---

**1:40: 1:40** Matiu 4:18-20 † **1:41: 1:41** A Karisito esaning di pek a wel ono. A tarai Israel la sira pek a wel o esaning la aslangi. Ana warwara Hibru di atongi a Mesaia, pa ana warwara Grik di atongi a Karisito. E Iesu a Karisito, e God i aslang pasi sur ir alaun a tarai. A propetla tagun nating la warwara na propet ono mang ir hanot, pa tarai juda la harnanai suri. **1:42: 1:42** Matiu 16:18 ‡ **1:42: 1:42** E Jon e tamana e Pita, bel e Jon a Tena Baptais.

<sup>45</sup> E Pilip i pastetek pas e Natanael, pa i atai i mange, “Mila ka pastetek pas a Karisito ning e Moses i warwara nigo tar onoi ting na Buk a Warkurai, pa propetla otleng la ka warwara nigo tar ono ana nunla na tumtumus, i e Iesu a te Nasaret, a nat e Josep.”

<sup>46</sup> Ika e Natanael i kelesi mange, “Nasaret! Mangmangasa, ta wakak a utna ot ir hanot mitingia?” E Pilip i kelesi mange, “Lamut, pa dar han sur ur oroi.”

<sup>47</sup> Ning e Iesu i oroi pas e Natanael i hanot teteki, i atongi ono mange, “A te Israel momol, bel i tasman a asasongo.”

<sup>48</sup> E Natanael i deken e Iesu mange, “U tasman mangmangasa iau?” I kelesi mange, “Ning belot e Pilip i ben u ute, ia ka oroi nigon tar u, ning u kes ting nahai a rakai a fig.”

<sup>49</sup> E Natanael i atai i mange, “Tena asaer, u a Nat e God, u a King anuna tarai Israel.”

<sup>50</sup> E Iesu i atai i mange, “Mangasa, u tortorot hok, anasa a atai u mang u kes tar nahai a rakai a fig? Lamur ur oroi a tatatnan utna kol ir hanot, ir itna tana utna ne.”

<sup>51</sup> Lamur e Iesu i atai i mange, “A atong momoli tamulo, mulor oroi a langit ir sapang, pa angelola ane God lar hanan kas pa lar hanan purum saot na Nat a Barsan.”

## 2

### *A ngasa na tona tinaulai tumo e Kana*

---

**1:45: 1:45** Lo 18:18; Aisaia 7:14; 9:6; Jeremaia 23:5; Esekiel 34:23

**1:49: 1:49** Matiu 14:33; 16:16; Mak 3:11      **1:51: 1:51** Stat 28:12

<sup>1</sup> Lamur tana naur a pukakiar di tol a ngasa na tona tinaulai tumo e Kana, ting na papar Galili. E tana e Iesu i han ana ngasa ning.

<sup>2</sup> Di nunung e Iesu pa nuna kakak a asaerla sur lar han ana ngasa na tona tinaulai.

<sup>3</sup> Ning a wain ka rop, e tana e Iesu i atai e Iesu mange, “Bel ma al wain.”

<sup>4</sup> E Iesu i kelesi mange, “Nang, sur asa u atai iau ono? A taim ning ar titol ono belot i sot.”

<sup>5</sup> Tana e Iesu i atai a tarai a titol mange, “Mulor tol asaning ir atai mulo sur mulor toli.”

<sup>6</sup> Diono na tatatnan koto na hat la tur tingia sur na gosgos kundi, i arlar ot ana titol ana lotu anuna tarai Juda ning la sira toli sur lar toh na matana e God. Taktakai a koto ne, di sira abukusi ana naur a bonot o natol a bonot a galan a malum.

<sup>7</sup> E Iesu i atai a tarai a titol mange, “Mulor tere bukus a kotola anal malum.” Pa la tere abukus la.

<sup>8</sup> Lamur, e Iesu i atai la mange, “Mulor ituh pas al malum miting na kotola, pa mulor losi tetek esaning i ningnigo ana ngasa.” Pa la toli larning.

<sup>9</sup> A ningnigo ana ngasa i gang tumusnan a malum ning ka wain rop. Bel i tasmani mang a wain ne i han mitaha, a tarai a titol ka la tasmani. I kabah maskan pas a barsan ning i taulai ana pukakiar ning,

<sup>10</sup> pa i atai i mange, “A taraila rop la sira tabar nigon a taraila ana wakak a wain. Ning la ka gang kol, la tabar kama a taraila ana wain ning

bel i wakak kol. Ika u, u bot artabar ana wain ning i wakak kol.”

<sup>11</sup> Ine a ningnigo na akinalang ning e Iesu i toli. I toli tumo e Kana ting na papar Galili. Ana akinalang ne, e Iesu i apuasa a matatarna, pa anuna kakak a asaer la tortorot ono.

<sup>12</sup> Lamur tana ngasa, i han utumo e Kapernaum taum oe tana pa na tastasnala pa anuna kakak a asaerla. La kes pas dingla na pukakiar ot tingia.

*E Iesu i kepsen a tena sisiuraila miting na rumai artabar*

*(Matiu 21:12-13; Mak 11:15-17; Luk 19:45-46)*

<sup>13</sup> Ning a lotu na Han Lakai anuna tarai Juda ka milau, e Iesu i han usaot e Jerusalem.

<sup>14</sup> Ting na woroh na rumai artabar, i oroi a tarai la siuran a bulumakaula, a sipsipla, pa tabunla, pa i oroi otleng na tena keles mani, la kes ting na nunla na logo.

<sup>15</sup> I iris pas a inaula sur a inau a harum, pa i lu purum la rop ono. I lu purum a bulumakaula pa sipsipla, pa i migen sarara a mani anuna tena keles manila, pa i migen lingir anunla na logola.

<sup>16</sup> Pa i atai la ning la siuran a tabunla mange, “Mulor los purum la mite! Gong mulo keles pas a rumai ane Tata sur a rumai a sisiurai!”

<sup>17</sup> Anuna kakak a asaerla la nuk pas a warwara ting na Buk Tabu mange, “A tnan nuknukik sur anum a rumai i arlar ana iah ning i ien iau.”

*Buk Song 69:9*

18 A tarai Juda la hanot ulak tetek e Iesu pa la dekeni mange, “Esi na akinalang ur asangan mila ono, sur milar tasmani mang e God i sune u sur ur tol a ututnala ne?”

19 E Iesu i keles la mange, “Mulor regen sen a rumai ne ane God pa ar atur ulak pasi ana natol a pukakiar ka.”

20 La keles e Iesu mange, “Di tol tar a rumai ne ana diat a bonot pa pisir diono na rau, pa u, ur tol ulak pasi ana natol a pukakiar ka?”

21 Ning e Iesu i warwara ana rumai ane God, i warwara larlar ot ana palaona.

22 Lamur ning e Iesu ka kamtur ulak kusun a minat, anuna kakak a asaerla la nuk pas a warwara ne. Pa la bot tortorot ana Buk Tabu, pa ana warwara ning e Iesu ka atong tari.

23 Ning e Iesu i kes saot e Jerusalem ana lotu na Han Lakai, a galis a tarai la oroi a akinalangla ning i toli, pa la tortorot ana risana.

24 Ika e Iesu bel i tortorot ana tik, anasa i tasman a taraila rop.

25 Bel i kapan sur tik ir atai i ana toltol anuna taraila, anasa i ot i tasman asaning kaning na balanla.

### 3

#### *E Iesu diau ma e Nikadimos*

1 Ning a barsan tagun a Parisaiola, a risana e Nikadimos, a ningnigo anuna tarai Juda.

---

2:19: 2:19 Matiu 26:61; 27:40    2:21: 2:21 1 Korin 6:19    2:22:  
2:22 Luk 24:6-8; Jon 12:16    2:23: 2:23 Jon 7:31    3:1: 3:1 Jon  
7:50; 19:39

<sup>2</sup> I han tetek e Iesu ana ning a morom pa i atai i mange, “Tena asaer, mila tasman u mang u a tena asaer ning e God i sune u. Bel ta barsan ir tolsot pas a akinalangla ning u sira toli, ning e God bel ir kes taum onoi.”

<sup>3</sup> E Iesu i kelesi mange, “A atong momoli tam, ning tik bel di agon tona pasi, bel ir tolsot sur ir oroi a matanitu ane God.”

<sup>4</sup> E Nikadimos i dekeni mange, “Dir agon tona mangmangasa pas tik ning ka bun? Mangmangasa, ir kas ulak tingui na balana e tana sur ir agon ulaki?”

<sup>5</sup> E Iesu i kelesi mange, “A atong momoli tam, esining bel di agon tona pasi ana malum pa ana Talngan Tabu, bel ir tolsot sur ir kas ting na matanitu ane God.

<sup>6</sup> Esining di agoni ana palaona, ir laun ana palaona ka, pa esining di agoni ana Talngan Tabu, ir laun ana inguna.

<sup>7</sup> Gong u kulkulan ning a atai u mang dir agon tona pas mulo.

<sup>8</sup> A wuwu i han taltal ana nuknukna, u longor a malwasna, ika bel u tasmani mang i han mitaha, pa ir han utaha. Mang otleng larning tetek la rop ning a Talngan Tabu i agon tona la.”

<sup>9</sup> E Nikadimos i dekeni mange, “Dir tol mangasa a utna ne?”

<sup>10</sup> E Iesu i kelesi mange, “U a tena asaer anuna tarai Israel. I mangasa ning bel u tasman a ututnala ne?”

**11** A atong momoli tam, mila warwara ana saning mila tasmani, pa mila warwara talapor ana saning mila ka oroi tari, ika bel mulo tortorot ana numila na warwara talapor.

**12** A atai mulo ana ututnala mite lapiu pa bel mulo tortorot onoi. Mulor tortorot mangmangasa ning ar atai mulo ana ututnala misaot na langit?

**13** Bel tik i han pas usaot na langit. A Nat a Barsan ka, esaning i han purum misaot na langit.

**14** Nating e Moses i akulam a soi saot na rakai, ting na hanua bel. Mang otleng larning dir akulam a Nat a Barsan usaot,

**15** sur la rop ning la tortorot onoi lar laun tikin.

**16** “E God i maris a rakrakan hanua, pa i saran tar e Natnalik takai sot ka, sur esining ir tortorot onoi, ir laun tikin, pa bel ir hirua.

**17** E God bel i sune e Natnalik ute na rakrakan hanua sur ir warkurai a taraila sur lar hirua. I sune i sur ir alaun la.

**18** Esining i tortorot onoi, bel dir warkurai i sur ir hirua. Ika, esining bel i tortorot, di ka warkurai tari sur ir hirua, anasa bel i tortorot oe Nat e God takai sot ka.

**19** Ine a kamkama warkurai ning e God i sarani: A talapor ka hanot te na rakrakan hanua, ika a tarai la mang ka sur a mormorom, pa talapor bel, anasa anunla toltol i laulau kol.

**20** La rop ning la sira tol a toltol laulaula, la nget ka a talapor, pa bel la han tetek a talapor,

---

**3:14: 3:14** Namba 21:9; Jon 8:28; 12:32      **3:15: 3:15** Jon 20:31  
**3:16: 3:16** Jon 3:36; 10:28; Rom 5:8; 8:32; 1 Jon 4:9-10      **3:17:**  
**3:17** Luk 19:10      **3:18: 3:18** Jon 5:24      **3:19: 3:19** Jon 1:5, 9; 8:12

sakana dir oroi puasa anunla na toltol laulau.

<sup>21</sup> Ika, esining i sira mur a momolna, i hanot ana talapor, sur dir oroi puasai mang anuna titolla i kamkamna ot ta e God.”

*E Jon a Tena Baptais i warwara talapor oe Iesu*

<sup>22</sup> Lamur e Iesu pa nuna kakak a asaer la han misaot e Jerusalem sur ning a natar a hanua kaning ot na papar Judia, pa la kes pas tingia, pa i baptais a taraila.

<sup>23</sup> Pa e Jon otleng i baptais tumo e Aion milau e Salim, anasa a galis a malum tingia. A tarai la hanot amon teteki sur ir baptais la.

<sup>24</sup> A titol ne i hanot ning belot di akas e Jon ting na karabus.

<sup>25</sup> Dingla na kakak a asaer ane Jon la arlak na warwara taum ana ning a te Juda ona munmun ning a tarai Juda la sira toli sur lar toh na matana e God.

<sup>26</sup> La han tetek e Jon pa la atai i mange, “Tena Asaer, a barsan ning mu kes taum pas tumo na ris a malum Jodan, pa u warwara talapor tar ono, kanumo ma i baptais, pa taraila rop la han teteki.”

<sup>27</sup> E Jon i atai la mange, “Ning e God saot na langit bel i saran tar ta utna tetek tik, bel ir kibasi.

<sup>28</sup> Mulo ot mulo ka longor tari ning a atongi mang, ‘Bel iau a Karisito. E God i sune iau sur ar nigo tana, pa i, ir mur.’

<sup>29</sup> A barsan ning i taulai ta hane, anunai ot a hane ning. A halin a barsan ning, ir harnanai pa

ir longlongor suri. Ning ir longor a elngena barsan ning i taulai, ir gas kol. Onone anuk a gasgas i arlar ana gasgas anuna halin a barsan ning i taulai, pa anuk a gasgas i bot sot.

<sup>30</sup> I ot ir leklek amon pa iau ar natarna amon.

### *Esaning i han misaot na langit*

<sup>31</sup> “Esaning i han misaot na langit, i leklek kol tana taraila rop. A barsan ning mite lapiu, mitet lapiu, pa i warwara ka ana ututnala mite lapiu. Esaning i han misaot na langit, i leklek kol tana taraila rop.

<sup>32</sup> Pa i warwara talapor ana saning i oroi i pa i longori, ika bel tik i tortorot ana nuna warwara talapor.

<sup>33</sup> Ika esining i tortorot ana nuna warwara talapor, i amomoli mang e God a momolna.

<sup>34</sup> Esaning e God i sune i, i warwara ana warwara ane God, anasa e God i saran arop tar a Talngan Tabu teteki.

<sup>35</sup> E Tamana i mang kol sur e Natnalik, pa i saran arop tar a ututnala uting na kuna.

<sup>36</sup> Esining i tortorot ona Nat e God i kibas a lalaun tikin. Ika esining i gilam ris kusun e Natnalik, bel ir kibas a lalaun, anasa a balakut ane God ka kes tar onoi.”

## 4

### *E Iesu i warwara taum ana hane Samaria*

---

**3:31: 3:31** Jon 8:23    **3:32: 3:32** Jon 3:11    **3:35: 3:35** Matiu 11:27; Jon 5:20    **3:36: 3:36** Jon 3:16-18; 1 Jon 5:12

<sup>1</sup> A Parisaiola la longori mang a galis a tarai a asaer la mur e Iesu, pa i baptais la. La galis tana tarai a asaer ane Jon.

<sup>2</sup> Ika e Iesu ot bel i baptais tik, anuna kakak a asaer ka, la baptais.

<sup>3</sup> Ning e Iesu ka tasmani mang a Parisaiola la ka longori, i kamtur misaot na papar Judia pa i ulak utumo na papar Galili.

<sup>4</sup> Ana nuna tinan i mur a ngas ning i han potora a papar Samaria.

<sup>5</sup> Tumo e Samaria, i hanot ting na hanua Sikar, milau a puka kabalapiu, ning nating ot e Jekop i tabar tar e natnalik e Josep onoi.

<sup>6</sup> Ning a kabut e Jekop ka kel tari tingia. A palaona e Iesu ka ngol ana tinan barah, pa i kes ting napir a kabut ning, ana iahkamis tostos.

<sup>7</sup> Ning a hane Samaria i hanot sur ir ituh, pa e Iesu i atai i mange, “Ur tabar iau anal malum.”

<sup>8</sup> Anuna kakak a asaer, la ka han uting na hanua, sur lar lou utna na hangan.

<sup>9</sup> A hane Samaria i keles e Iesu mange, “U a te Juda, pa iau a hane Samaria. Sur asa u nunung iau sur al malum?” Anasa a tarai Juda bel la baltaum ana Samariala.

<sup>10</sup> Ika e Iesu i kelesi mange, “Ning u ka tasman tar a artabar ane God, pa u ka tasman otleng esaning i nunung u sur al malum, ur nunungi, pa ir tabar u ana malum a lalaun.”

<sup>11</sup> A hane i atai i mange, “Leklek, bel ta itituh anumi, sur ur ituh al malum ono, pa kabut

otleng i kes purum kol. Mitaha a malum a lalaun ning?

<sup>12</sup> U nuki mang u leklek ta e tubundala e Jekop ning i tabar mila ana kabut ne? I taum ana natnatnala pa nuna na inagoi otleng, la rop la gang ono.”

<sup>13</sup> E Iesu i kelesi mange, “La rop ning la gang a malum ne, lar mos ulak ka.

<sup>14</sup> Ika esining ir gang a malum ning ar tabari ono, bel ir mos ulak. A malum ning ar tabari ono, i arlar ana matana malum ting na nuna lalaun, ning ir burburak ot, pa ir tabari ana lalaun tikin.”

<sup>15</sup> A hane i atai i mange, “Leklek, tabar iau ana malum ning, sur gong ma a mos ulak, pa gong ma a ulak sur ar ituh.”

<sup>16</sup> E Iesu i atai i mange, “Ur han, ben pas anum a barsan pa mur ulak ute.”

<sup>17</sup> A hane i kelesi mange, “Bel anuk ta barsan.” E Iesu i atai i mange, “I tostos ot ning u atongi mang, bel anum ta barsan.

<sup>18</sup> U ka taulai tar dilima na barsan, pa i ning u kes taum ono onone, bel anum a barsan. A momolna ot ning u atongi tak.”

<sup>19</sup> A hane i kelesi mange, “Leklek, a tasmani mang u a propet.

<sup>20</sup> A tumtubumila nating la lotu tetek e God saot na mangir ne, ika mulo a tarai Juda mulo atongi mang dir lotu tetek e God saot e Jerusalem.”

<sup>21</sup> E Iesu i kelesi mange, “Oroi, a momolna ne a atongi tam, a taim ir hanot, ning bel ma mulor lotu tetek e Tata saot na mangir ne, pa saot otleng e Jerusalem.

<sup>22</sup> Mulo a Samariala bel mulo tasman esining mulo lotu teteki. Ika mila a tarai Juda, mila tasman ot esaning mila lotu teteki, anasa mila tasman a ngas ning e God i alaun a taraila ono.

<sup>23</sup> A taim ir hanot pa ka hanot, ning na tena lotu momol lar lotu tetek e Tata ana ingunla pa ana momolna. A ngas a tena lotula larning, e Tata i mang kol sur la.

<sup>24</sup> E God a Ingun, pa la ning lar lotu teteki, lar lotu ot ana ingunla pa ana momolna.”

<sup>25</sup> A hane i atai i mange, “A tasmani mang a Mesaia ning di atongi mang a Karisito, ir hanot, pa ir papak ana ututnala rop tetek dala.”

<sup>26</sup> E Iesu i kelesi mange, “Iau ne, a warwara tam.”

<sup>27</sup> Ano otning, anuna kakak a asaerla la ulak, la kulkulan kol ning la oroi e Iesu i warwara taum ana hane. Ika, bel tik onla i dekeni mang, “U mang sur asa?” pa, “Asa kamkamna ning u warwara taum ono?”

<sup>28</sup> A hane ning i han kusun anuna koto, pa i ulak sur a hanua pa i atai a taraila mang,

<sup>29</sup> “Mulo lamut, mulor oroi ning a barsan i atai iau ana ututnala rop ning ia ka tol tari nating. Ngandek a Mesaia ma?”

<sup>30</sup> Pa taraila ning, la han kusun a hanua pa la han tetek e Iesu.

<sup>31</sup> Ning a hane ka han, a kakak a asaer la nunung kol teteki mange, “Tena asaer, ur hangan pas.”

<sup>32</sup> Ika e Iesu i keles la mange, “Aka utna na hangan kanet, ning bel mulo tasmani.”

<sup>33</sup> A kakak a asaer la deken artalai la mange, “Ngandek tik ka tabar tari anal utna na hangan?”

<sup>34</sup> E Iesu i atai la mange, “Aka utna na hangan ine, ar mur a nuknuk esaning i sune iau ute, par tol arop anuna titol.

<sup>35</sup> Mulo sira atongi mange, ‘Diat a kalang kaning ot sur dir sol.’ Ika a atai mulo mange: Mulor tai usa lanigo, pa mulor oroi a barimla, la ka makos rop, pa ka sang sur dir sol.

<sup>36</sup> A tena sol ning i sol a utna na hangan, i los arlou ono. Pa utna ning i sol pasi, ai a tarai ning la kibas a lalaun tikin. A tena omomai pa tena sol, diar gas taum.

<sup>37</sup> I momol ot, a warwara ning a tarai la sira atongi mange, ‘Takai i omomai, pa takai otleng i sol.’

<sup>38</sup> A sune mulo sur mulor sol ting na barim ning mulo ot bel mulo oman tari. Dingla na tarai masik ot la tol tari, pa mulo ka los pas a arlou ana nunla na titol.”

### *A Samariala la tortorot*

<sup>39</sup> A galis a Samaria ting na hanua ning, la tortorot oe Iesu, anasa a hane ning i warwara

talapor mange, “I atai iau ana ututnala rop ning ia ka tol tari nating.”

<sup>40</sup> A tarai Samaria la han tetek e Iesu pa la angongosi sur ir kes taum onla, pa i kes pas naur a pukakiar tingia.

<sup>41</sup> Pa galis ulak la tortorot, anasa ana nuna warwarala.

<sup>42</sup> La atai a hane mange, “Onone mila ka tortorot, bel ana warwara ning u atongi oe Iesu. Mila ot mila ka longori, pa mila ka tasman momoli mang ai a Tena Alaun sur a taraila mite na rakrakan hanua.”

### *E Iesu i alangolango pas a nat a ningnigo*

<sup>43</sup> Lamur tana naur a pukakiar, e Iesu i han utumo e Galili.

<sup>44</sup> E Iesu ot ka atong tari mange, “A taraila bel la hanrawai a propet ting na hanua ngasna.”

<sup>45</sup> A taraila mitumo e Galili la ka han pas ana lotu na Han Lakai saot e Jerusalem, pa la ka oroi tar a ututnala ning e Iesu i toli ting na lotu. Pa ning e Iesu i hanot tumo e Galili, a tarai la gas pasi.

<sup>46</sup> E Iesu i ulak utumo e Kana ting na papar Galili, a hanua ning i keles tar a malum sur a wain. Ning a ningnigo tagun a matanitu, e natna barsan i sasam tumo e Kapernaum.

<sup>47</sup> Ning i longori mang e Iesu i han misaot na papar Judia utumo e Galili, i han teteki pa i nunungi sur ir han utumo e Kapernaum sur ir alangolango e natna barsan ning milau ir mat.

<sup>48</sup> E Iesu i atai i mange, “Ning bel mulo oroi al ututna na kulkulan pa al akinalang, bel mulor tortorot.”

<sup>49</sup> A ningnigo anuna matanitu i atai i mange, “Leklek, dar han kapit sakana natuklik ir mat!”

<sup>50</sup> E Iesu i kelesi mange, “Ur han ka, e natumlik ir laun.” A barsan ning i tortorot ana warwara ane Iesu, pa i ulak.

<sup>51</sup> Ning belot i hanot, anuna tena titol orosla la han barati pa la atai i mang, e natumlik ka laun.

<sup>52</sup> I deken la mange, “Esi na taim momol ning a natuklik i laun ulak ono?” La kelesi mange, “Nabong, ana 1 kilok, a laplapang i rop kusuni.”

<sup>53</sup> Tamana kaklik i nuk ulak pas a taim ning e Iesu i atai i mange, “E natumlik ir laun.” Pa i oroi lalani mang a taim ot ning e Iesu i atai ono, a laplapang i rop kusun e natnalik. Pa latamana rop la tortorot oe Iesu.

<sup>54</sup> Ine a munaur a akinalang, ning e Iesu i toli tumo e Galili, ning i han misaot e Judia.

## 5

### *E Iesu i alangolango pas ning a barsan ting na tnan kabapolo Betesda*

<sup>1</sup> Lamur e Iesu i han usaot e Jerusalem sur a tnan lotu anuna tarai Juda.

<sup>2</sup> Ning a tnan kabapolo, di atongi ana warwara Hibu mang e Betesda, kanisaot e Jerusalem, milau a tnan taman ning di atongi mang “Taman

ngas a sipsip”. Pa dilima na parada la tur talilis a kabapolo ning.

<sup>3-4</sup> A galis a tarai ning la kurah ana urmatana tinsaman, la sira borbor tingia. La ning la kut, la ning bel la han, pa la ning a palaonla i mat.\*

<sup>5</sup> Pa ning a barsan i kes tingia ka kurah pas natol a bonot pa pisir siwal a rau.

<sup>6</sup> Ning e Iesu i oroi i ning i borbor tar tingia, pa i talapor teteki mang a barsan ning ka bongnani ana tinsaman, i dekeni mange, “Mangasa, u mang sur ur langolango?”

<sup>7</sup> A barsan ning i kelesi mange, “Leklek, ning a kabapolo i tonton, bel tik ir nangan iau sur ir los tar iau. Ning a tohi sur ar han ar munmun, tik masik ka ir dun nigo alar iau.”

<sup>8</sup> E Iesu i atai i mange, “Ur kamtur, ur kibas a mat ngasim, pa ur han.”

<sup>9</sup> Ono otning a barsan ning i langolango, i kamtur, i kibas a mat ngasna, pa i han.

A utna ne i hanot ana Pukakiar Sabat.

<sup>10</sup> Dingla na tarai Juda la atai a barsan ning e Iesu i alangolango pasi mange, “A Sabat ne! A warkurai i mang, gong di los a mat ono.”

<sup>11</sup> Pa i keles la mange, “A barsan ning i alangolango pas iau, i atai iau mang, ar los a mat ngasik par han.”

---

\* **5:3-4: 5:3-4** Dingla na tena tastasmal ana Buk Tabu la nuki mang dingla na warwarala otleng i kes te na ves ne. I manglarne: *La harnanai sur a kabapolo ning ir tonton. Dingla na pukakiar a angelo anuna Leklek ir han purum uting na kabapolo, pa ir atontoni. Tik ka ning ir munmun nigo ting na kabapolo ning i tonton, ir langolango kusun anuna tinsaman.* **5:8: 5:8** Matiu 9:6 **5:10: 5:10** Nehemia 13:19; Jeremaia 17:21

<sup>12</sup> La dekeni mange, “Esi na barsan ning i atai u mang ur los pas a mat ngasim pa ur han?”

<sup>13</sup> Ika a barsan ning bel i tasman esining i alangolango pasi, anasa e Iesu i han potora kunum a taraila ning.

<sup>14</sup> Lamur ot, e Iesu i pastetek pas a barsan ning ting na rumai artabar. I atai i mange, “Oroi, u ka langolango ne. Gong ulak u tol ta toltol laulau, sakana ta laulau a utna kol ir hanot hom.”

<sup>15</sup> A barsan ning i han pa i atai a tarai Juda mange, “E Iesu ot i alangolango pas iau.”

<sup>16</sup> Ono otning, a tarai Juda la turpas a tol a gininla tetek e Iesu, anasa i tol a ututnala ne ana Pukakiar Sabat.

<sup>17</sup> E Iesu i atai la mange, “E Tata bel i manah ana titol, larning iau otleng bel ar manah.”

<sup>18</sup> Ine a kamkamna ning a tarai Juda la mang kol sur lar umkol e Iesu. La balakuti, bel i kamkamna, mang i titol ana Pukakiar Sabat ka, i kamkamna otleng mang i ot i atong e God mang e Tamana, pa ana warwara ne, i arlar i ot oe God.

### *E God i saran a warkurai ta e Natnalik sur ir warkurai ono*

<sup>19</sup> E Iesu i keles la mange, “A atong momoli tamulo, a Nat e God bel ir tol ta utna ana nuknukna ot, i tol ka asaning i oroi e Tamana i toli. Anasa asaning e Tamana i toli, e Natnalik otleng ir toli.

<sup>20</sup> E Tamana i mang kol sur e Natnalik, pa i asangani ana ututnala rop ning i sira toli. Ir

asangani otleng ana tatatnan utna tan dingla ne, pa mulor kulkulan onoi.

<sup>21</sup> E Tamana i akamtur a minatla pa i tabar la ana lalaun, mang otleng larning tetek e Natnalik, ir tabar la ning i mang sur ir tabar la ana lalaun.

<sup>22</sup> E Tamana bel ir warkurai tik. Ika ka saran tar a warkuraila rop ta e Natnalik, sur ir warkurai ono,

<sup>23</sup> sur a taraila rop lar hanrawai e Natnalik larning la hanrawai e Tamana. Esining bel i hanrawai e Natnalik, bel i hanrawai e Tamana otleng, ning i sune i ute.

<sup>24</sup> “A atong momoli tamulo, esining i longor anuk na warwara pa i tortorot o esaning i sune iau ute, ka kibas a lalaun tikin, pa bel ir hirua ana warkurai. Ka han kusun a minat sur a lalaun tikin.

<sup>25</sup> A atong momoli tamulo, a taim ir hanot, pa ka hanot, ning a minatla lar longor a Nat e God, pa la ning la longori lar laun.

<sup>26</sup> E God a kama lalaun pa i sarani otleng tetek e Natnalik, sur i otleng a kama lalaun.

<sup>27</sup> E God i saran tar a warkurai tana sur ir warkurai a taraila ono, anasa ai a Nat a Barsan.

<sup>28</sup> Gong mulo kulkulan ana warwara ne, anasa a taim ir hanot, pa la rop ning la borbor ting na kulam a minat lar longor a elngena.

<sup>29</sup> Lar kamtur kusun a tung a minatla. La ning la ka tol tar a wakak a toltol lar kamtur kusun a minat sur a lalaun tikin. Pa la otleng ning la ka

---

**5:22: 5:22** Jon 5:27; Aposel 10:42      **5:23: 5:23** Pilipai 2:10-11; 1 Jon 2:23      **5:24: 5:24** Jon 3:15-18      **5:28: 5:28** Daniel 12:2; Matiu 16:27; Aposel 24:15

tol tar a toltol laulau, lar kamtur kusun a minat sur a hinirua tikin.”

### *A warwara talapor oe Iesu*

<sup>30</sup> E Iesu i warwara ot tetek a tarai Juda mange, “Bel ar tol ta utna ana nuknukik ot, a warkurai a taraila ana utna ning a longori ta e Tata. Pa anak a warkurai i tostos, anasa bel a mur a nuknukik, a mur ot a nuknukna esaning i sune iau ute.

<sup>31</sup> Ning ar warwara talapor ulak ot hok, anak a warwara bel ir mamahat.

<sup>32</sup> Tik masuk ot i warwara talapor hok, pa a tasmani mang anuna warwara talapor hok i momol kol.

<sup>33</sup> “Mulo sune dingla na tarai tetek e Jon a Tena Baptais, pa i warwara talapor hok, pa anuna warwara talapor i momol.

<sup>34</sup> Bel a kapan sur tik ning ir warwara talapor hok, ika a atongi larne sur dir alaun mulo.

<sup>35</sup> E Jon i arlar ana lam, ning i irnga pa i talapor, pa mulo gas ning mulo tai siklik pas ka ana talaporna.

<sup>36</sup> “Ika ar atongi tetek mulo ana warwara talapor hok ning i itna tana warwara talapor ane Jon. A titolla ning a sira toli, la warwara talapor hok. Anasa a titolla ning e Tata i sarani tak sur ar tol asoti, i asangani mang i sune iau ute.

<sup>37</sup> Pa e Tata, ning i sune iau ute, i ot ka warwara talapor tar hok. Bel mulo longor a elngena, pa bel mulo oroi tar a matana otleng.

<sup>38</sup> Pa bel mulo tong akes anuna warwarala ting na balamulo, anasa bel mulo tortorot o esaning i sune i ute.

<sup>39</sup> Mulo sira was wakak a Buk Tabu, anasa mulo nuki mang mulor kibas a lalaun tikin ono. Ika a Buk Tabu otleng i warwara talapor ka hok!

<sup>40</sup> Ika bel mulo mang sur mulor han tetek iau, sur mulor kibas a lalaun.

<sup>41</sup> “Bel a mang sur a tarai lar atong aleklek iau.

<sup>42</sup> Anasa a tasman mulo ot, mang bel mulo mang sur e God ting na balamulo.

<sup>43</sup> A hanot ana risana e Tata, pa bel mulo gas pas iau. Ika ning tik masik ir hanot ana risana ot, mulor gas pasi.

<sup>44</sup> Mulo mang kol sur a tarai lar atong aleklek pas mulo, pa bel mulo rakrakai sur e God ir atong aleklek mulo, e God esaning i takai sot ka. Ning i manglarning, bel mulo tortorot hok.

<sup>45</sup> Gong mulo nuki mang iau, ar tiu mulo tetek e Tata. E Moses ning mulo tortorot mang ir nangan mulo, i ot ir tiu mulo.

<sup>46</sup> Ning mulo tortorot oe Moses, mulor tortorot otleng hok, anasa ka tumtumus nigo tar hok.

<sup>47</sup> Ika ning bel mulo tortorot ana tumtumusla ane Moses, mulor tortorot mangmangasa ana nuk a warwarala?”

## 6

*E Iesu i tabar dilima na rip a tarai  
(Matiu 14:13-21; Mak 6:30-44; Luk 9:10-17)*

<sup>1</sup> Lamur e Iesu i han lakai a puka tasi Galili, ning di atongi otleng mang a puka tasi Tiberias.

<sup>2</sup> A tnan kunum a tarai la muri, anasa la ka oroi tar a akinalangla e Iesu i toli, ning i alangolango la ning la kurah.

<sup>3</sup> E Iesu i han kas usaot na mangir, pa i kes taum ana nuna kakak a asaerla.

<sup>4</sup> A lotu na Han Lakai anuna tarai Juda ka milau.

<sup>5</sup> Ning e Iesu i tai tar, i oroi pas a tnan kunum a tarai la han teteki. I atai e Pilip mange, “Dalar lou al utna na hangan taha, sur dalar tabar a taraila ne ono?”

<sup>6</sup> E Iesu i atongi larne sur ir toho e Pilip. I ot ka tasman asaning ir toli.

<sup>7</sup> E Pilip i kelesi mange, “A arlou tagun a siwal a kalang ning dir lou pas a utna na hangan ono, bel ir arlar onla.”

<sup>8</sup> Ning a hala nuna kakak a asaerla, a risana e Endru, a tas e Saimon Pita, i atai e Iesu mange,

<sup>9</sup> “Ning a kaklik barsan kane i los dilima na bret ning di toli ana bali, pa naur a natar a sis. Ika ir arlar mangmangasa ona taraila ne?”

<sup>10</sup> A ulai rop ka, ting na pukna ning, pa e Iesu i sune anuna kakak a asaerla sur lar akes a taraila tingia. Pa la kes. A wawas ana tarai ka i arlar ana dilima na rip, pa gurarala pa kakakla otleng la hangan taum onla.

<sup>11</sup> E Iesu i kibas pas dilima na bret, i atong wakak pas tetek e God onoi. Pa i asalari tana taraila ning la kes tingia. I toli otleng larning ana sis, pa la ieni arlar larning la mang suri.

<sup>12</sup> Ning la ka masur rop, i atai anuna kakak a asaerla mange, “Mulor suah taum wakak a mah a utna na hanganla, sur gong di alaulau a utna na hangan.”

<sup>13</sup> Pa la suah taum a mah a utna na hangan tagun dilima na bret ning, pa la song bukus pas ning a bonot pa pisir naur a rat.

<sup>14</sup> Ning a tarai la oroi a akinalang ne i toli, la atongi mange, “I momol ot, a barsan ne, ai a Propet ning di atongi mang ir hanot ute na rakrakan hanua.”

<sup>15</sup> Ning e Iesu i tasmani mang la mang sur lar han teteki sur lar angongosi sur ir king, i han masik kusun la usaot na ning a mangir.

*E Iesu i han saot na puka tasi  
(Matiu 14:22-33; Mak 6:45-52)*

<sup>16</sup> Ning ka rah morom, a kakak a asaerla ane Iesu la han utumo na puka tasi.

<sup>17</sup> La kas ana mon, pa la turpas a lakai a puka tasi sur e Kapernaum. Ka morom, pa e Iesu belot i hanot tetek la.

<sup>18</sup> A tnan wuwu i ragati pa tatatnan top i kamtur.

<sup>19</sup> Ning la ka ulusu bakbak, arlar ana dilima na kilomita, la oroi pas e Iesu i han saot na palai a puka tasi tetek la. Pa la matmataut kol.

<sup>20</sup> Ika e Iesu i atai la mange, “Gong mulo matmataut, iau ka ne.”

<sup>21</sup> La gas pasi pa la akasi uting na mon. Pa la sot kakat ting na pukna ning la han suri.

*A tarai la tai sur e Iesu*

<sup>22</sup> Ana ning a pukakiar lamur, a kunum a taraila ning la kes tumo na ris a puka tasi, la tasmani mang ning a mon ka i kes tingia. Pa la tasmani mang a kakak a asaerla ka la han, e Iesu bel i kas taum onla.

<sup>23</sup> Lamur dingla na mon mitumo e Tiberias la sot milau ting na pukna ning a Leklek i atong wakak ana bret pa kunum a tarai la hangan ano.

<sup>24</sup> Ning a kunum a tarai la oroi mang e Iesu taum ana nuna kakak a asaerla bel la kes tingia, la kas ana monla, pa la han utumo e Kapernaum sur lar tai sur e Iesu.

### *E Iesu a bret a lalaun*

<sup>25</sup> Ning a tarai la pastetek pas e Iesu tumo na ris a puka tasi, la dekeni mange, “Tena Asaer, nangse u han tar ute?”

<sup>26</sup> E Iesu i keles la mange, “A atong momoli tamulo, bel mulo tai sur iau anasa mulo oroi a akinalangla ning a toli, bel. Mulo tai ka sur iau anasa mulo ien a bret pa mulo masur ono.

<sup>27</sup> Gong mulo rakrakai ka sur a utna na hangan ning i sira marase. Mulor rakrakai sur a utna ning ir kes sur a lalaun tikin, ning a Nat a Barsan ir tabar mulo ono. Anasa e God e Tata ka saran tar a rakrakai tak sur ar toli larne.”

<sup>28</sup> La dekeni mange, “Asaning milar toli sur milar tol a titolla ning e God i mang suri?”

<sup>29</sup> E Iesu i keles la mange, “A titolla ning e God i mang suri, mulor tortorot o esaning i sune i ute.”

<sup>30</sup> Pa la dekeni mange, “Ur tol esi na akinalang sur milar oroi pa milar tortorot hom onoi? Asaning ur toli?”

<sup>31</sup> Na tubumila la ien a mana ting na hanua bel, larotning di ka tumus tari ting na Buk Tabu mange, ‘I tabar la ana bret misaot na langit pa la ieni.’” *Buk Song 78:24*

<sup>32</sup> E Iesu i atai la mange, “A atong momoli tamulo, bel e Moses ning i tabar la ana bret misaot na langit, e Tata i tabar la. Pa onone i tabar mulo ana bret momol misaot na langit.

<sup>33</sup> Esaning i han purum misaot na langit, i ot a bret ane God, ning i saran a lalaun tetek a taraila rop te na rakrakan hanua.”

<sup>34</sup> La atai i mange, “Leklek, ur tabar mila ana bret ning, ana pukakiarla rop.”

<sup>35</sup> E Iesu i atai la mange, “Iau a bret a lalaun. Esila ning lar han tetek iau, bel lar murak, pa esila ning lar tortorot hok, bel lar mos ulak.

<sup>36</sup> Ia ka atai tar mulo mang mulo ka oroi tar iau, ika bel mulo tortorot.

<sup>37</sup> La rop ning e Tata i saran tar la tak, lar han tetek iau, pa esining ir han tetek iau, bel ar kepseni, bel.

<sup>38</sup> Anasa a han purum misaot na langit, bel sur ar mur a nuknukik, ika sur ar mur ot a nuknuk esaning i sune iau ute.

<sup>39</sup> Ine a nuknuk esaning i sune iau ute, gong tik ta halinla ning i saran tar la tak ir hirua. Ar

akamtur ulak la rop kusun a minat ana ararop a pukakiar.

<sup>40</sup> A nuknuk e Tata i mange, la rop ning la tai tetek e Natnalik pa la tortorot onoi, lar laun tikin, pa iau ar akamtur la kusun a minat ana ararop a pukakiar.”

<sup>41</sup> Dingla na Juda la ururai oe Iesu, anasa i atongi mange, “Iau a bret ning i han purum misaot na langit.”

<sup>42</sup> Pa la atongi mange, “E Iesu a nat e Josep ka. Dala tasman ot e tamana pa e tana. Pa sur asaning i atongi mang i han purum misaot na langit?”

<sup>43</sup> E Iesu i keles la mange, “Gong mulo ururai.

<sup>44</sup> Bel tik ir han sot pas tetek iau. Ika e Tata ot ning i sune iau, ir ben tari tetek iau, par akamturi kusun a minat ana ararop a pukakiar.

<sup>45</sup> A propetla la ka tumus tari mange, ‘E God ir asaer la rop.’ *Aisaia 54:13*

Pa la rop ning la longor e Tata pa la asaer tana, lar han tetek iau.

<sup>46</sup> Bel tik i oroi e Tata. Esan kaning i han pas misaot ta e God, i oroi tar e Tamana.

<sup>47</sup> A atong momoli tamulo, esining i tortorot hok, ka kibas a lalaun tikin.

<sup>48</sup> “Iau a bret a lalaun.

<sup>49</sup> Nating na tubumulo la ien a mana ting na hanua bel, ika la ka mat.

<sup>50</sup> Ika a bret ne i han purum misaot na langit, ning tik ir ieni, bel ir mat.

<sup>51</sup> Iau a bret ning i laun, ning i han purum misaot na langit. Esining ir hangan ana bret ne, ir laun tikin. A bret ne ar artabar ono, a palaok. A sarani sur a taraila te na rakrakan hanua lar kibas lalaun onoi.”

<sup>52</sup> Dingla na tarai Juda, la arlak artalai la, pa la atongi mange, “A barsan ne ir tabar mangmangasa dala ana palaona sur dalar ieni?”

<sup>53</sup> Pa e Iesu i atai la mange, “A atong momoli tamulo, ning bel mulor ien a palaona Nat a Barsan pa bel mulor gang a sulukna, bel al lalaun momol ir kes omulo.

<sup>54</sup> Esining ir ien a palaok pa ir gang a sulukik, ka kibas a lalaun tikin, pa iau ar akamturi kusun a minat ana ararop a pukakiar.

<sup>55</sup> Anasa a palaok a utna na hangan momol, pa sulukik a malum a gang momol.

<sup>56</sup> Esining ir ien a palaok pa ir gang a sulukik, ir laun hok, pa iau ar laun onoi.

<sup>57</sup> E Tata ning i laun i sune iau, pa a laun anasa oe Tata. Mangotleng larning tetek esining ir ien a palaok, ir laun anasa hok.

<sup>58</sup> Ine a bret ning i han misaot na langit. Bel i arlar ana mana ning na tubumulola nating la ieni, pa la ka mat. Ika esining ir hangan ana bret ne, ir laun tikin.”

<sup>59</sup> A warwarala ne, e Iesu i atongi ning i asaer a taraila ting na rumai lotu tumo e Kapernaum.

### *A warwarala na lalaun tikin*

<sup>60</sup> A galis miting na nuna tarai a asaerla ning la longor a warwarala ne la atongi mange, “A asaer ne i ngangaten kol, esi ir tong akes pasi?”

<sup>61</sup> E Iesu i tasmani mang anuna tarai a asaer la ururai onoi. I deken la mange, “I mangasa, a warwara ne i alaulau mulo?”

<sup>62</sup> Ir mangasa tetek mulo ning mulor oroi a Nat a Barsan ir ulak usaot sur a hanua ning nating ka kes pas ano?

<sup>63</sup> A Talngan Tabu i saran a lalaun. A rakrakai ana palaona tik bel i to pas ta utna. A warwarala ning a atongi tamulo, i hanot tagun a Talngan Tabu, pa i saran a lalaun.

<sup>64</sup> Ika dingla omulo bel la tortorot.”

Anasa e Iesu ka tasman la ning bel lar tortorot onoi, pa esan otleng ning ir saran tari uting na kuna hiruala.

<sup>65</sup> Pa i atongi otleng mange, “Ine a kamkamna ning a atai mulo mang bel tik ir tolsot sur ir han tetek iau. Ika, ning e Tata ir sarani tetek iau, ir han tetek iau.”

<sup>66</sup> Pa galis miting na nuna tarai a asaer la ulak kusuni, pa bel ma la muri.

<sup>67</sup> E Iesu i deken ning a bonot pa pisir naur a kakak a asaer anunai mange, “I mangasa, mulo otleng, mulo mang sur mulor ulak kusun iau?”

<sup>68</sup> E Saimon Pita i kelesi mange, “Leklek, milar han tetek esi? Anasa a warwarala na lalaun tikin anumi ka.

<sup>69</sup> Mila ka tortorot pa mila tasmani mang u a Tena Totoh ane God.”

<sup>70</sup> E Iesu i atai la mange, “Ia ka aslang pas mulo ning a bonot pa pisir naur a kakak a asaerla, gepi? Ika takai omulo a mot ka!”

<sup>71</sup> I warwara oe Judas, a nat e Saimon Iskariot, takai miting na ning a bonot pa pisir naur a kakak a asaer, ning ir saran tar e Iesu uting na kuna hiruala.

## 7

### *Na tastas e Iesu bel la tortorot onoi*

<sup>1</sup> Lamur tana, e Iesu i taltal ting na hananuala tumo e Galili. Bel i mang sur ir taltal saot na papar Judia, anasa dingla na Juda la sang sur lar umkoli.

<sup>2</sup> Ning a lotu na Palturturup anuna tarai Judala ka milau,

<sup>3</sup> na tastasna e Iesu la atai i mange, “I wakak sur ur kamtur mite pa ur han usaot e Judia sur anum a kakak a asaer lar oroi a ututna na kulkulan ning ur toli.

<sup>4</sup> Ning tik i mang sur a tarai lar tasmani, bel i sira tol kumnan a ututnala. Ning u sira tol a ututnala ne, i wakak ning ur tol talapori sur a taraila te na rakrakan hanua rop lar tasman u!”

<sup>5</sup> Na tastasna la warwara larne, anasa la otleng bel la tortorot onoi.

<sup>6</sup> E Iesu i atai la mange, “Anuk a taim belot i sot sur ar han, ika tetek mulo, a pukakiarla i langolango ka sur mulor han.

<sup>7</sup> A taraila te na rakrakan hanua bel lar nget mulo, ika la nget iau, anasa a atai la ana nunla na toltol laulau.

<sup>8</sup> Mulo, mulor han usaot na lotu na Palturturup. Iau bel ar han kapit, anasa anuk a taim belot i sot.”

9 Ning ka warwara tar, i kes suai tumo e Galili.

*E Iesu i han sur a lotu na Palturturup*

10 Ning na tastasna e Iesu la ka han sur a lotu na Palturturup, e Iesu i mur la, ika bel i asangan talapori tetek a taraila. I han kumna ka.

11 Dingla na Juda la tai sur e Iesu ting na lotu, la deke mang, “A barsan ne kanahaia?”

12 A galis a tarai la wasisik oe Iesu. Dingla na tarai la atongi mang, “Ai a wakak a barsan,” pa dingla otleng la atongi mang, “Bel i a wakak a barsan. I sira asongo a taraila ka.”

13 Pa bel tik i warwara talapor onoi, anasa la matatan dingla na tarai Juda.

*E Iesu i asaer a taraila ning la hanot ana lotu na Palturturup*

14 Ning la ka kes potor ana pukakiarla na lotu na Palturturup, e Iesu i kas uting na woroh na rumai artabar, pa i turpas a asaer a taraila.

15 Dingla na tarai Juda la kulkulan kol pa la deke mange, “A barsan ne bel i asaer pas. I tasman mangasa a tastasmanla ne?”

16 E Iesu i keles la mange, “A asaerla ne a asaer ono, bel anuki, anun esaning i sune iau ute.

17 Ning tik i mang sur ir mur a nuknuk e God, ir tasman lalani, mang anak a asaer ne ta e God, o mite ka na nuknukik.

18 Esining i warwara ka ana nuknukna, i mang ka sur dir aleklek pasi. Ika esining i mang sur dir aleklek pas e God ning i sune i ute, i atong a momolna, pa bel ta asasongo tingia.

19 E Moses ka saran tar a Warkuraila tamulo, ika bel tik ta halimulo i muri. Sur asa mulo mang sur mulor umkol iau?”

20 A kunum a tarai la kelesi mange, “A mot ka solong tar u. Esi i mang sur ir umkol u?”

21 E Iesu i keles la mange, “A tol ning a utna na kulkulan, pa mulo kulkulan rop onoi.

22 E Moses i saran tar a warkurai tamulo sur mulor kot a palaona kakak barsanla. Ika a warkurai ne, bel ane Moses, a taraila ot nating la turpasi. Pa dingla na Pukakiar Sabat otleng mulo kot a palaona kakak barsanla.

23 Mulo sira kot a palaona kakak barsanla ana Pukakiar Sabat, sur gong di lakai a warkurai ane Moses. Ning mulo toli larne, sur asa mulo balakut tetek iau ning a alangolango pas a barsan ana Pukakiar Sabat?

24 Gong mulo warkurai ana numulo na tatatai ka, mulor warkurai ana warkurai ning i tostos.”

### *Dingla na tarai bel la tortorot mang e Iesu ai a Karisito*

25 Dingla na tarai misaot e Jerusalem la deke mange, “I ka a barsan ning la mang sur lar umkoli, gepi?

26 Oroi, onone i tur pa i warwara na matana taraila, pa bel la kelesi. Ngandek na ningnigo la ka tasmani mang ai a Karisito?

27 Ning a Karisito ir hanot, bel tik ir tasmani mang ir hanot mitaha. Ika a barsan ne dala tasman ka a hanua ngasna.”

7:19: 7:19 Aposel 7:53; Rom 2:21-24

7:20: 7:20 Jon 8:48; 10:20

7:22: 7:22 Wok Pris 12:3; Stat 17:9-13

7:23: 7:23 Jon 5:8-10, 16

7:27: 7:27 Jon 7:41; 9:29

<sup>28</sup> Kaning ot e Iesu i asaer ting na woroh na rumai artabar, i warwara kol mange, “I mangasa, mulo tasman momol iau ot, pa hanua otleng ning a han mitingia? Bel a hanot ute ana nuknukik. Esaning i sune iau i atong a momolna. Pa mulo, bel mulo tasman esaning i sune iau.

<sup>29</sup> Ika iau, a tasmani, anasa a han misaot tana pa i ot i sune iau.”

<sup>30</sup> Pa tarai Juda la mang sur lar tong akes pasi, ika bel tik i toli, anasa anuna taim belot i sot.

<sup>31</sup> A galis miting na kunum a tarai la tortorot oe Iesu pa la atongi mange, “A barsan ne i tol tar a galis a akinalangla. Ngandek a Karisito ot ne?”

<sup>32</sup> Ning a Parisaiola la longor a kunum a tarai la wasisik larne oe Iesu, a leklek a tena artabarla pa Parisaiola, la sune sen a tena tai alarla tagun a rumai artabar, sur lar tong akes pasi.

<sup>33</sup> Pa e Iesu i atai la mange, “Bel ar kes bongnan iau napirimulo, ar han ulak tetek esaning i sune iau ute.

<sup>34</sup> Mulor tai sur iau, ika bel mulor oroi tetek iau. Pa hanua ning ar han suri, bel mulo tolsot sur mulor han tingia.”

<sup>35</sup> Dingla na tarai Juda la deke artalai la mange, “A barsan ne ir han ma utaha, ning bel dalar pasteki? Ir han uting na hananuala anuna tarai Grik, ning anundala na tarai la kes ia? Ngandek ir asaer a tarai Grik?

<sup>36</sup> I atongi mang dalar tai suri, ika bel dalar pasteki, pa bel dala tolsot sur dalar han otleng

uting na hanua ning ir kes ia. Esi na kamkama warwara ne?”

*A warwara larlar ana Talngan Tabu*

<sup>37</sup> Ana ararop a pukakiar ana lotu na Palturturup, a pukakiar ning i itna kol, e Iesu i tur pa i warwara kol mange, “Ning tik ir mos, i wakak sur ir han tetek iau par agangi.

<sup>38</sup> Esining ir tortorot hok, ‘na malum a lalaun lar dun ot miting na nuna lalaun,’ larning di ka tumus tari ting na Buk Tabu.”

<sup>39</sup> E Iesu i warwara ana Talngan Tabu. La ning la tortorot o e Iesu lamur dir tabar la ono. Belot di saran a Talngan Tabu, anasa e Iesu belot i kibas anuna matatar.

*A tarai la taptapagal anasa oe Iesu*

<sup>40</sup> Dingla na taraila miting na kunum ning la longor a warwara ne, la atongi mange, “A momolna ot, a barsan ne a propet ning e God i sune i ute.”

<sup>41</sup> Dingla otleng la atongi mang, “Ai a Karisito.” Pa dingla la atongi mang, “A Karisito bel ir hanot mitumo e Galili.

<sup>42</sup> A Buk Tabu i atongi mange, a Karisito ir hanot miting na mangis a tarai ane Dewit. Ir hanot mitumo e Betlehem, a hanua ning nating e Dewit i kes ia.”

<sup>43</sup> Pa la taptapagal anasa oe Iesu.

<sup>44</sup> Dingla na tarai la mang sur lar tong akesi, ika bel ta halinla i tolsoti.

---

**7:37: 7:37** Wok Pris 23:36; Aisaia 55:1; Jon 4:14      **7:38: 7:38**  
 Aisaia 58:11      **7:39: 7:39** Jon 16:7; 20:22; Aposel 2:4      **7:40: 7:40**  
 Jon 6:14      **7:41: 7:41** Jon 1:46      **7:42: 7:42** Buk Song 89:3-4;  
 Maika 5:2

### *A ningnigola bel la tortorot*

<sup>45</sup> Ning na tena tai alar miting na rumai artabar la ulak, a leklek a tena artabarla tetek e God pa Parisaiola la deken la mange, “Sur asa bel mulo dat pas e Iesu ute?”

<sup>46</sup> A tena tai alarla miting na rumai artabar la keles la mange, “Bel tik i sira warwara lar a barsan ne!”

<sup>47</sup> A Parisaiola la deken la mange, “Mangasa, mulo otleng ka ben rongon pas mulo?”

<sup>48</sup> Mangasa mulo nuki mang ta halimila a ningnigola pa Parisaiola ka tortorot onoi? Bel!

<sup>49</sup> A kunum a taraila ne, ning la tortorot oe Iesu, bel la tasman a Warkuraila ane Moses. A balakut ane God i kes onla.”

<sup>50</sup> Ning a hala Parisaiola, a risana e Nikadimos, esaning nating i hanot pas tetek e Iesu, i atai la mange,

<sup>51</sup> “Ana warkurai anundala, bel dalar tiu oros ka tik ning belot di longori, sur dir talapor ana saning i toli.”

<sup>52</sup> La kelesi ka mange, “Ge, u otleng mitumo e Galili? Ur asaer ana Buk Tabu pa ur mananos onoi mang a propet bel i hanot mitumo e Galili.”

### *A hane ning i tol a toltol laulau taum ning a barsan*

[  
<sup>53</sup> Pa taraila rop la han sarara sur anunla na hananua.

## 8

<sup>1</sup> Ika e Iesu i han kas usaot na Mangir Oliw.

<sup>2</sup> Ana kobot ning ot ana pukakiar lamur, e Iesu i hanot ulak ting na woroh na rumai artabar, pa taraila rop la han taum teteki. I kes pa i asaer la.

<sup>3</sup> A tena asaerla tagun a warkurai pa Parisaiola, la ben kas pas ning a hane tetek e Iesu. A hane ning di pastetek pasi ning i tol a toltol laulau taum ning a barsan. La arakrakai pasi sur ir tur salanigo na matana taraila.

<sup>4</sup> La atai e Iesu mange, “Tena Asaer, a hane ne di pastek pasi ning i tol a toltol laulau taum ning a barsan.

<sup>5</sup> Ana warkurai ane Moses, ning ta hane ir toli manglarning, dir wolot amati ana hatatla. Pa u, ur atong asa onoi?”

<sup>6</sup> La dekeni larning, anasa la mang sur lar toho e Iesu, sur ta warwara ir atongi, pa lar tiwi ono. Ika e Iesu i tudu purum, pa i tumtumus ana pitlai kuna ting na kabalapiu.

<sup>7</sup> Ning la dekeni pa la dekeni larning, i tur pa i atai la mange, “Ning tik ta halimulo bel i tol tar ta toltol laulau, ir wolot nigon a hane ne ana ta hat.”

<sup>8</sup> E Iesu i tudu purum ulak, pa i tumtumus ulak ting na kabalapiu.

<sup>9</sup> Ning la longor a warwara ne, la rop la purum taktakai. A lapunla la purum nigo, tuk e Iesu kama kaning ia, taum ana hane ning di atur tari napirna.

<sup>10</sup> E Iesu i tur, pa i deken a hane ning mange, “Lak, la ning la tiu u, la kanaha ma? Bel ta halinla i warkurai u?”

<sup>11</sup> A hane i kelesi mange, “Bel.” Pa e Iesu i atai i mange, “Tau otleng bel ar warkurai u. Ur han, pa gong ulak u tol tar ta toltol laulau.”]\*

### *E Iesu a talapor anuna rakrakan hanua*

<sup>12</sup> E Iesu i warwara ulak tetek a taraila, pa i atongi mange, “Iau a talapor anuna rakrakan hanua. Esining i mur iau, bel ir han ting na mormorom, ir kibas a talapor ana lalaun.”

<sup>13</sup> A Parisaiola la atai i mange, “Anum a warwara talapor hom bel i mamahat, anasa u ot u warwara.”

<sup>14</sup> Pa e Iesu i keles la mange, “Ning iau ot a warwara talapor hok, anuk a warwara talapor i momol, anasa iau ot a tasman a hanua ning a han mitingia, pa hanua ning ar han suri. Ika mulo, bel mulo tasman a hanua ning a han mitingia, pa hanua ning ar han suri.

<sup>15</sup> Mulo, mulo warkurai ka ana warkurai anuna taraila, ika iau bel a warkurai tik.

<sup>16</sup> Ika ning ar warkurai, anuk a warkurai ir tostos, anasa bel iau ka a toli, miau ot ma e Tata, ning i sune iau ute.

---

**8:11: 8:11** Jon 5:14 \* **8:11: 8:11** Dingla na tena tastasmai ana Buk Tabu la nuki mang e Jon bel i tumus a warwara kaning oe 7:53 tuk 8:11. La nuki mang tik masak i tumus murmuri. **8:12: 8:12** Aisaia 49:6; Jon 1:4-9; 9:5; 12:46 **8:14: 8:14** Jon 5:31-32; 7:28 **8:15: 8:15** Jon 12:47 **8:16: 8:16** Jon 5:30; 8:29

<sup>17</sup> Di ka tumus tari ting na numulo a warkurai mange, ‘Ning a warwara anuna naur i arlar ka ana ta utna, anundiau a warwara i momol.’

<sup>18</sup> Iau ne a warwara talapor hok, pa e Tata ning i sune iau ute, i otleng i warwara talapor hok.”

<sup>19</sup> La dekeni mange, “E tamam kanaha?” E Iesu i keles la mange, “Bel mulo tasman iau, pa bel mulo tasman otleng e Tata. Ning mulor tasman iau, mulor tasman e Tata otleng.”

<sup>20</sup> E Iesu i atong a warwarala ne ting na rumai artabar, ting na pukna ning di sira suah mani na artabar ono. Ika bel tik i tong akesi, anasa anuna taim belot i sot.

### *E Iesu i atumarang la ning bel la tortorot*

<sup>21</sup> E Iesu i atai ulak a taraila mange, “Ar han kusun mulo, mulor tai sur iau, pa mulor mat taum ana numulo na toltol laulau. A hanua ning ar han suri, bel mulo tolsot sur mulor han tingia.”

<sup>22</sup> Dingla na tarai Juda la atongi mange, “Asa kamkamna ning i atongi mang, ‘A hanua ning ar han suri, bel mulor tolsot sur mulor han tingia?’ Ngandek ir umkol pasi ma?”

<sup>23</sup> E Iesu i keles la mange, “Mulo mite lapiu, pa iau, misaot. Mulo mite na rakrakan hanua, iau bel mite na rakrakan hanua.

<sup>24</sup> Ine a kamkamna ning a atai mulo mang mulor mat ana numulo na toltol laulau. Ning bel

mulo tortorot hok mang iau ot ne<sup>†</sup>, mulor mat taum ana numulo na toltol laulau.”

<sup>25</sup> Pa la dekeni mange, “Esi u?” E Iesu i keles la mange, “Ia ka atai tar mulo turpasi ana kamkama nuk a titol, tuk onone.

<sup>26</sup> A galis a utna ar atongi omulo ning ar warkurai mulo onoi, anasa esaning i sune iau i momol, pa iau, a atai ka a taraila te na rakrakan hanua ana saning a longori tana.”

<sup>27</sup> Bel la tasmani mang e Iesu i warwara tetek la oe Tamana.

<sup>28</sup> Pa e Iesu i atongi mange, “Ning mulor akulam a Nat a Barsan saot, mulor tasmani mang iau ning, pa mulor tasmani otleng mang bel a tol ta utna ana nuknukik, e Tata i asaer iau ana saning a atongi.

<sup>29</sup> Esaning i sune iau i kes taum hok, bel i han kusun iau, anasa a sira tol asaning i gas onoi.”

<sup>30</sup> A galis ning la longor a warwarala ne, la tortorot oe Iesu.

### *A momolna ir alangolango mulo*

<sup>31</sup> E Iesu i atai a tarai Juda ning la tortorot onoi mange, “Ning mulor kibas anuk a asaerla, mulo anuk na tarai a asaer momol.

<sup>32</sup> Pa mulor tasman a momolna, pa momolna ir alangolango mulo.”

<sup>33</sup> La keles e Iesu mange, “Mila na tumtubuna e Abaram, bel mila titol lar a tena titol orosla

---

† **8:24: 8:24** “Iau ot ne”. A puka warwara ne i arlar ana warwara ning e God i atongi ta e Moses ana rakai ning i irnga. A kamkamna mang e Iesu i atongi mang i ot a Mesaia, a Karisito. **8:28: 8:28**  
Jon 3:14 **8:33: 8:33** Matiu 3:9

tana tik tuk onone. Asa kamkamna ning u atongi mang a momolna ir alangolango mila?”

<sup>34</sup> E Iesu i keles la mange, “A atong momoli tamulo, la rop ning la tol na toltol laulau, la na tena titol oros ana toltol laulau.

<sup>35</sup> A tena titol oros tetek ta kabaitamana, bel ir kes tikin tetek la, ika ning ir naur a suana ta natundiau, i ning tagun diau momol.

<sup>36</sup> Ning a Nat e God i alangolango mulo, mulor langolango momol.

<sup>37</sup> A tasmani ot mang mulo na tumtubuna e Abaram. Ika, mulo sang sur mulor umkol iau, anasa anuk a warwara bel i kes omulo.

<sup>38</sup> A warwara ana saning a oroi ta e Tata, pa mulo otleng, mulo tol asaning mulo longori ta e tamamulo.”

<sup>39</sup> La kelesi mange, “E Abaram a tamamila.” E Iesu i keles la mange, “Ning e Abaram a tamamulo momol, mulor tol asaning i toli.

<sup>40</sup> Mulo mang sur mulor umkol iau, anasa a atai mulo ana momolna ning a longori ta e God. E Abaram bel i tol ta utna larne.

<sup>41</sup> Mulo, mulo tol ot a titolla ning a tamamulo i toli.”

La keles e Iesu mange, “Bel di agon oros mila ka ting na ngas, tamamila ot e God.”

<sup>42</sup> E Iesu i atai la mang, “Ning e God a Tamamulo, mulor mang sur iau, anasa a han misaot ta e God, pa onone a kes te. Bel a hanot ana nuknukik, i ot i sune iau.

<sup>43</sup> Sur asa bel mulo tasman lalan anak a warwara? Anasa bel mulo tolsot sur mulor longor asaning a atongi.

<sup>44</sup> E tamamulo e Satan, pa mulo mang ot sur mulor mur na nuknukna. Tagun nating ot, ai a tena umkol a taraila, pa bel i tasman a momolna, anasa bel ta momolna i kes onoi. Ning i asasongo, i warwara ana nuna warwara momol ot, anasa i ot a tena asasongo pa tamana asasongo.

<sup>45</sup> Bel mulo tortorot hok, anasa a atong a momolna.

<sup>46</sup> Esi na halimulo ir tiu sot pas iau ana ta toltol laulau? Ning a atong a momolna, i mangasa ning bel mulo tortorot hok?

<sup>47</sup> Esining ane God i longor a warwarala ane God. Ika mulo, bel mulo longori, anasa bel mulo ane God.”

### *E Iesu i leklek ta e Abaram*

<sup>48</sup> Dingla na tarai Juda la atai e Iesu mange, “Mila tasman momoli mang u a te Samaria, pa mot kaning hom.”

<sup>49</sup> Pa e Iesu i keles la mange, “Bel ta mot kane hok. A hanrawai e Tata, ika mulo, bel mulo hanrawai iau.

<sup>50</sup> Bel a mang sur a tarai lar aleklek pas iau, ika takai sot ka, a tnan tena warkurai, ir aleklek pas iau.

<sup>51</sup> A atong momoli tamulo, esining ir mur anak a warwara, bel ir mat.”

<sup>52</sup> Dingla na tarai Juda la atai i mange, “Onone mila tasman momoli mang a mot kaning hom! E Abaram ka mat, pa propetla otleng la ka mat, ika u atongi mang esining ir mur anum a warwara bel ir mat.

<sup>53</sup> Mangasa, u nuki mang u leklek tana tamamila e Abaram? E Abaram ka mat, pa propetla otleng la ka mat. U nuki mang u esi na ngas a barsan?”

<sup>54</sup> E Iesu i keles la mange, “Ning ar aleklek pas iau ot, anak a warwara bel i to pas ta utna. E Tata ot ir aleklek pas iau, esaning mulo atongi mang anumulo a God.

<sup>55</sup> Mulo, bel mulo tasman e God, ika iau, a tasmani. Ning ar atongi mang bel a tasmani, iau otleng a tena asasongo lar mulo. A tasman e God, pa a mur anuna warwarala.

<sup>56</sup> Tamamulo e Abaram i gas sur ir oroi anak a tinan ot. I oroi, pa i gas kol onoi.”

<sup>57</sup> A tarai Juda la atai i mange, “Belot i dilima na bonot a rau a lalaun anumi. I mangasa ning u atongi mang u ka oroi tar e Abaram?”

<sup>58</sup> E Iesu i keles la mange, “A atong momoli tamulo, ning belot di agon e Abaram, ia ka laun nigo tar.”

<sup>59</sup> Ning e Iesu i atongi larné, la los pas a hatatla sur lar woloti, ika i mumun pa i han kusun a rumai artabar.

## 9

### *E Iesu i apalpalas pas a kut*

<sup>1</sup> Ning e Iesu i han amon, i oroi pas ning a barsan, ning e tana i agoni a kut.

<sup>2</sup> Anuna kakak a asaer la dekeni mange, “Tena Asaer, asa kamkamna ning di agon pasi ka kut? Esi i tol a toltol laulau? I ot, o e tamana pa e tana?”

<sup>3</sup> E Iesu i atongi mange, “A barsan ne bel i tol ta toltol laulau, e tamana pa e tana otleng bel. I kut ka sur a tarai lar oroi a rakrakai a titol ane God onoi.

<sup>4</sup> Ning kanet i kabakiar, i wakak sur dalar tol a titolla anun esaning i sune iau ute. Ning kar morom, bel ma tik ir titol.

<sup>5</sup> Ning a kes te na rakrakan hanua, iau a talapor anuna rakrakan hanua.”

<sup>6</sup> Ning e Iesu ka atong tari larne, i namis ting lapiu, i gis pas a namisna taum ana kabalapiu, pa i sabari ting na naur a matana.

<sup>7</sup> E Iesu i atai i mange, “Ur han, pa ur gos pas naur a matam ting na kabapolo Siloam.” (Siloam a kamkamna mang di arsune.) Pa i han, i gos pas naur a matana. Ning i ulak, ka tai.

<sup>8</sup> Na halalna pa taraila ning la oroi tari nating ning i sira nunung utna, la deke mange, “Ngandek i ka a barsan ning i kes pa i sira nunung, gepi?”

<sup>9</sup> Dingla na tarai la atongi mange, “Ai ot ning.” Dingla otleng la atongi mange, “Bel. I tai arlar ka ana barsan ning.” Ika, i ot i atongi mang, “Iau ka.”

10 La dekeni mange, “Di apalpalas mangmangasa naur a matam?”

11 I keles la mange, “A barsan ning di atongi e Iesu, i gis pas a namisna taum ana kabalapiu, pa i sabar tar naur a matak ono. Pa i atai iau mange, ‘Ur han utumo na kabapolo Siloam sur ur gos pas naur a matam.’ Pa a han, a gos pas naur a matak, pa a tai kakat.”

12 La dekeni mange, “Kanaha ma a barsan ning?” I keles la mange, “Bel a tasmani.”

### *Na Parisaio la deken a kut*

13 La ben pas a barsan ning nating i kut tetek a Parisaiola,

14 anasa e Iesu i gis pas a namisna taum ana kabalapiu, pa i apalpalas pas naur a matana ana Pukakiar Sabat.

15 A Parisaiola otleng la deken a barsan ning mange, “Di apalpalas mangmangasa pas naur a matam?” I keles la mange, “I sabar tar naur a matak ana kabalapiu ning i gis pasi taum ana namisna, pa a gos pasi, pa a tai.”

16 Dingla na Parisaio la atongi mange, “A barsan ning i tol a utna ne, bel misaot ta e God, anasa i titol ana Pukakiar Sabat.” Dingla na taraila otleng la atongi mange, “Ning a barsan ne a laulau a barsan, ir tol mangmangasa a akinalangla ne?” Pa la taptapagal.

17 Lamur na Parisaio la deken a barsan ning mange, “Ur atong asa ana barsan ning i apalpalas pas naur a matam?” I keles la mange, “Ai a propet.”

18 Dingla na tarai Juda bel la tortorot mang, a barsan ne lanigo i kut pa di apalpalas a matana. Pa la arsune pas e tamana pa e tana, pa la deken diau mange,

19 “A natumu ine, ning mu atongi mang mu agon pasi ka kut? Asa kamkamna ning onone ka tai?”

20 E tamana pa e tana dia keles la mange, “Mia tasmani mang a natumiau ot ne, pa mia tasmani mang mia agon pasi ka kut.

21 Ika bel mia tasmani mang i tai mangmangasa, bel mia tasmani otleng mang esining i apalpalas pas naur a matana. Ka itna, mulor dekeni, i ot ir warwara talapor onoi.”

22 E tamana pa e tana dia warwara larne, anasa dia matatan a tarai Juda, ning la atongi mang, ning tik ir tortorot oe Iesu mang ai a Karisito, dir sairasi kusun a rumai lotu.

23 Ine a kamkamna ning e tamana pa e tana dia atongi mang, “Ka itna, mulor dekeni.”

24 Munaur ono la ben ulak pas a barsan ning di agon pasi ka kut, pa la atai i mange, “Ur aleklek e God ana saning i toli hom! Mila tasmani mang a barsan ning i apalpalas pas naur a matam, a tena tol a toltol laulau.”

25 I keles la mange, “Bel a tasmani mang a tena tol a toltol laulau o bel. Ning a utna ka a tasmani: Nating a kut, pa onone ia ka tai.”

26 La dekeni mange, “Asaning i toli hom? I apalpalas mangasa pas naur a matam?”

27 I keles la mange, “Ia ka atong tari tamulo, pa bel mulo longori. Sur asa mulo mang sur mulor

longor ulaki? Ngandek mulo otleng mulo mang sur mulo anuna kakak a asaerla?”

<sup>28</sup> La anani, pa la atongi mange, “U a kaklik asaer anunai, ika mila a kakak a asaerla ane Moses.

<sup>29</sup> Mila tasmani mang e God i warwara tetek e Moses, ika a barsan ning bel mila tasmani mang i han mitaha.”

<sup>30</sup> A barsan i keles la mange, “Ine a utna na kulkulan! Bel mulo tasmani mang i han mitaha, ika ka apalpalas pas naur a matak.

<sup>31</sup> Dala tasmani mang e God bel ir longor a niaring anuna tena tol a toltol laulau, ir longor ka esining i hanrawai i pa i sira mur a nuknukna.

<sup>32</sup> Nating ot tuk onone, bel di tasman tar tik ning ir apalpalas pas ta kut, ning di agon pasi ka kut.

<sup>33</sup> Ning a barsan ne bel misaot ta e God, bel ir tolsot pas ta utna.”

<sup>34</sup> La kelesi mange, “Di agon pas u ana toltol laulau, pa u mang sur ur asaer mila!” Pa la kepseni kusun a rumai lotu.

### *Esining bel i tortorot i a kut*

<sup>35</sup> Ning e Iesu i longori mang di ka kepsen a barsan ning, i tai suri. Ning ka pastek pasi, i dekeni mange, “U tortorot ot ona Nat a Barsan?”

<sup>36</sup> I kelesi mange, “Leklek, ur atai iau, ‘Esi a Nat a Barsan?’, sur ar tortorot onoi.”

<sup>37</sup> E Iesu i kelesi mange, “Onone u ka oroi i, iau ka ne a warwara tam.”

<sup>38</sup> A barsan ning i atongi mang, “Leklek, a tortorot!” I kes ana naur a bokona hana pa i lotu teteki.

<sup>39</sup> E Iesu i atongi mange, “A hanot ute na rakrakan hanua sur ar saran a warkurai mang: la ning la kut lar tai, pa la ning la tai lar kut.”

<sup>40</sup> Dingla na Parisaio kaning taum ono, la longor a warwara ne, pa la dekeni mange, “U nuki mang mila otleng mila kut?”

<sup>41</sup> I keles la mange, “Ning mulor kut bel tik ir tiu mulo ana ta toltol laulau. Ika onone mulo atongi mang mulo tai. I maining anumulo na toltol laulau kaning ot i kes.”

## 10

*A warwara larlar ana tena tai alar anuna sipsipla*

<sup>1</sup> E Iesu i atongi mange, “A atong momoli tamulo, esining bel i kas ting na taman a woroh na sipsip, pa i abit kas ka usai, ai a tena kinkinau pa tena ras oros a ututnala.

<sup>2</sup> Ika a barsan ning i kas tostos ting na taman, a tena tai alar momol anuna sipsipla.

<sup>3</sup> A tena tai alar miting na taman ir sapang pasi sur ir kas. A sipsipla la longor lalan a elngena. I kabah la ana risanla, pa i ben purum la.

<sup>4</sup> Ning ka ben purum rop pas anuna sipsipla, i nigon la pa la muri, anasa la longor lalan a elngena.

<sup>5</sup> Bel lar mur ta wasira, lar liu kusuni ka, anasa bel la longor lalan a elngena.”

<sup>6</sup> E Iesu i atong a warwara larlar ne tanla, ika bel la kibas lalan asaning i warwara larlar onoi.

*E Iesu a wakak a tena tai alar anuna sipsipla*

<sup>7</sup> I maining e Iesu i atong ulaki mange, “A atong momoli tamulo, iau a taman anuna sipsipla.

<sup>8</sup> La rop ning la hanot nigo tak, a tena kinkinaula pa tena ras oros pas a ututnala, ika a sipsipla bel la longor tanla.

<sup>9</sup> Iau a taman. Esining ir han tetek iau pa ir kas te hok dir alauni. Ir kas, pa ir purum pa ir pastek ana utna na hangan.

<sup>10</sup> A tena kinkinau i hanot ka sur ir kinkinau, pa ir umkol a sipsipla pa ir alaulau la. Ika iau, a hanot sur lar kibas a lalaun, a lalaun ning i bukus ana wakakna.

<sup>11</sup> “Iau a wakak a tena tai alar anuna sipsipla. A saran tar anuk a lalaun sur ar mat sur la.

<sup>12-13</sup> A barsan ning di lowi ka, bel a tena tai alar momol anuna sipsipla, pa sipsipla bel anunai. Ning ir oroi pas ta ngalngaliah na pap ir hanot, ir liu ka kusun a sipsipla, anasa i titol ka sur a mani, pa bel i nuknuk sur a sipsipla. Pa ngalngaliah na pap ir harat la pa ir lu sauran la.

<sup>14</sup> “Iau a wakak a tena tai alar anuna sipsipla. A tasman anuk a sipsipla, pa anuk a sipsipla otleng la tasman iau,

<sup>15</sup> arlar lar e Tata i tasman iau, pa iau a tasmani, pa a saran tar anuk a lalaun sur ar mat sur la.

<sup>16</sup> Anuk dingla na sipsip otleng, bel la kes ting na woroh na sipsip ne. Ar ben pas la otleng, pa lar longor a elngek, sur la rop lar kes ka ana takai a woroh, pa takai sot ka ir tena tai alar anunla.

<sup>17</sup> “E Tata i mang sur iau, anasa iau ot a saran tar anuk a lalaun, sur lamur ar los ulak pasi.

<sup>18</sup> Bel tik ir kepsen anuk a lalaun, iau ot ar saran tari. Iau ot a warkurai sur ar saran tari, par los ulak pasi. A titol ne ning e Tata i sune iau sur ar toli.”

<sup>19</sup> A tarai Juda la taptapagal ana warwarala ane Iesu.

<sup>20</sup> A galis onla, la atongi mange, “A mot i solongi, pa nuknukna ka talar. Sur asaning mulo longor pasi?”

<sup>21</sup> Dingla na tarai la atongi mange, “A ngas a warwara ne bel anuna tik ning a mot i kas tar onoi. Mangasa, tik ning a mot i kas onoi i tolsot sur ir apalpalas a matana kutla?”

### *A tarai Juda bel la tortorot oe Iesu*

<sup>22</sup> Lamur la tol a tnan lotu sur lar nuk pas a pukakiar ning la sapang a rumai artabar onoi. La tol a lotu ne saot e Jerusalem ana kalang na kotkoto.

<sup>23</sup> E Iesu i han amon ting na parada ane Solomon ting na rumai artabar.

<sup>24</sup> A tarai Juda la tur talilis pasi, pa la dekeni mange, “Nangse ma ur atai momol mila? Ning u a Karisito, ur atai talapor mila.”

<sup>25</sup> E Iesu i keles la mange, “Ia ka atong tari tamulo, ika bel mulo tortorot. A titolla ning a toli ana risana e Tata, la warwara talapor hok.

<sup>26</sup> Ika bel mulo tortorot, anasa mulo bel anuk a sipsipla.

<sup>27</sup> Anuk na sipsip la longor a elngek, pa a tasman la, pa la sira mur iau.

<sup>28</sup> A saran a lalaun tikin tanla, pa bel lar hirua. Pa bel tik ir rasen la kusun a kuk.

<sup>29</sup> E Tata ning i saran tar la tak, i leklek tana ututnala rop, pa bel tik ir rasen la kusun a kuna.

<sup>30</sup> Miau ma e Tata, miau takai ka.”

<sup>31</sup> A tarai Juda la los ulak pas a hatatla sur lar wolot e Iesu.

<sup>32</sup> E Iesu i atai la mange, “Ia ka asangan tar a galis a ututnala na kulkulan na matamulo, ning e Tata i saran tari tak sur ar toli. Esi na utna mite na ututnala ne, ning mulo mang sur mulor wolot iau onoi?”

<sup>33</sup> La kelesi mange, “Mila mang sur milar wolot u, bel i kamkamna ana ta utna na kulkulan ning u toli, i kamkamna mang u anatarna pas e God! U a barsan ka u, pa u atongi mang u e God.”

<sup>34</sup> E Iesu i atai la mange, “Mulo tasmani ot mang di ka tumus tari ana numulo na Warkurai mang e God i atongi mang ‘Mulo a godla’. *Buk Song 82:6*

<sup>35</sup> I atong la mang la a godla, la ning di saran tar a warwarala ane God tanla. Bel tik i tolsot sur ir

kepsen a warwara na Buk Tabu.

<sup>36</sup> Pa iau, e Tata ot i aslang pas iau, pa i sune iau ute na rakrakan hanua. Pa sur asa mulo tiu iau mang a warwara laulau oe God, ning a atongi mang iau a Nat e God?

<sup>37</sup> Ning bel a tol a titolla ane Tata, gong mulo tortorot hok.

<sup>38</sup> A tol ot anuna titolla. Ika ning bel mulo tortorot ana nuk a warwara, mulor tortorot hok anasa ana titolla ning a toli, sur mulor tasmani mang e Tata kane hok, pa iau kaning ono.”

<sup>39</sup> Lamur la mang ulak sur lar tong akesi, ika i han ka kusun la.

<sup>40</sup> E Iesu i kotop ulak a malum Jodan sur a pukna ning e Jon i sira baptais nigo ono, pa i kes tingia.

<sup>41</sup> A galis a tarai la han tetek e Iesu pa la atongi mange, “E Jon bel i tol al akinalang, ika a warwarala rop ning i atongi ana barsan ne, i momol ot.”

<sup>42</sup> Pa galis a taraila tingia la tortorot oe Iesu.

## 11

### *E Lasarus i mat*

<sup>1-2</sup> Ning a barsan mitumo e Betani, a risana e Lasarus, i kurah. Latas ma e Maria pa e Mata. E Maria ning i pek tar a malum na tomtoboh ting na naur a hana Leklek, pa i sah sengsenge diau ana hihna.

<sup>3</sup> Ditas hane dia sarai warwara sur e Iesu mange, “Leklek, a halim ning u katnani i kurah.”

<sup>4</sup> Ning e Iesu i longori, i atongi mange, “E Lasarus bel ir mat ana tinsaman ne. I kurah ka sur dir oroi a matatar ane God, sur a matatar a Nat e God ir hanot talapor.”

<sup>5</sup> E Iesu i maris e Mata pa tasna hane e Maria pa tasindiau e Lasarus.

<sup>6</sup> Ning ka longor tari mang e Lasarus i kurah, i kes ulak pas naur a pukakiar ting na hanua ning i kes ia.

<sup>7</sup> Lamur e Iesu i atai a kakak a asaerla mange, “Dalar ulak utumo na papar Judia.”

<sup>8</sup> Pa la atai i mange, “Tena Asaer, nating ka a tarai Juda la mang sur lar wolot amat u, pa onone u mang sur ulak utumo?”

<sup>9</sup> E Iesu i keles la mange, “Ning a pukakiar i arlar ana ning a bonot pa pisir naur a awa (12 awa) gepi? Ning tik ir taltal ana kamis bel ir buh a hana, anasa i tai ana talapor te na rakrakan hanua.

<sup>10</sup> Ika ning tik ir taltal ana morom ir loloko, anasa bel ta talapor.”

<sup>11</sup> Lamur i atongi otleng mange, “A halindala e Lasarus ka borbor duman, par han sur ar amata pasi.”

<sup>12</sup> A kakak a asaer la kelesi mange, “Leklek, ning i borbor duman ka, ir langolango ulak ka.”

<sup>13</sup> E Iesu i warwara ana minat e Lasarus, ika a kakak a asaer la nuki mang e Lasarus i borbor duman ka.

<sup>14</sup> Pa e Iesu i atai talapor la mange, “E Lasarus ka mat.

<sup>15</sup> Pa iau, a gas ning bel a kes tumo, sur mulor tortorot. Dalar han teteki.”

<sup>16</sup> E Tomas, ning di atongi otleng mang a Kasang, i atai a kakak a asaerla mange, “Dalar han taum sur dala otleng dalar mat taum onoi.”

### *E Iesu a lalaun ulak, pa lalaun momol*

<sup>17</sup> Ning e Iesu i hanot, i longori mang di ka akas tar a minat e Lasarus ting na kulam a minat, pa ka diat a pukakiar alari.

<sup>18</sup> E Betani i milau ka e Jerusalem, i arlar ka ana natol a kilomita,

<sup>19</sup> pa galis a tarai Juda la hanot tetek e Mata pa e Maria sur lar kes amahat diau ana tasindiau ning i mat.

<sup>20</sup> Ning e Mata i longori mang e Iesu kaning ma ot, i purum sur ir han barati, ika e Maria i kes ka ting na rumai.

<sup>21</sup> E Mata i atai e Iesu mange, “Leklek, ning ur kes ot te, a tasiklik bel ir mat.

<sup>22</sup> Ika a tasmani mang, ning onone ur nunung e God sur ta utna, ir sarani ka tam.”

<sup>23</sup> E Iesu i atai i mange, “A tasimlik ir kamtur ulak ka.”

<sup>24</sup> E Mata i kelesi mange, “A tasmani mang ir kamtur ulak ana ararop a pukakiar.”

<sup>25</sup> E Iesu i atai i mange, “Iau a lalaun ulak kusun a minat, pa iau a lalaun momol. Esining i tortorot hok, ning ir mat, ir laun ulak,

<sup>26</sup> pa esining i laun pa i tortorot hok, bel ir mat. U tortorot ot ana warwara ne?”

<sup>27</sup> E Mata i kelesi mange, “Leklek, i momol. A tortorot mang u a Karisito, a Nat e God, ning di ka atai tari mang ir han ute na rakrakan hanua.”

<sup>28</sup> Lamur ning e Mata ka atong tari larne, i ulak pa i kabah kumnan pas e tasna hane e Maria, pa i atai i mange, “A Tena Asaer ka hanot pa i deke sur u.”

<sup>29</sup> Ning e Maria i longori, i purum kapit pa i han teteki.

<sup>30</sup> E Iesu belot i hanot ting na hanua, i kaning ot na pukna ning e Mata i pastetek tari ia.

<sup>31</sup> A tarai Juda ning la kes taum oe Maria ting na rumai sur lar kes amahati, la oroi mang i purum kapit kusun la utumo lapiu, pa la muri. Anasa la nuki mang ir han uting na kulam a minat sur ir domos.

<sup>32</sup> Ning e Maria i hanot ting na pukna ning e Iesu i kes ia, i oroi teteki, i kes ana bokona hana salanigo tana, pa i atongi mange, “Leklek, ning ur kes tar ot te, a tasiklik bel ir mat.”

<sup>33</sup> Ning e Iesu i oroi e Maria pa tarai Juda ning la han taum ono la domos, tingui na inguna i balakut pa balana i mamahat kol.

<sup>34</sup> E Iesu i deken la mange, “Mulo aborbor tar a minatna taha?” La kelesi mange, “Leklek, han ute sur ur oroi i.”

<sup>35</sup> Pa e Iesu i domos.

<sup>36</sup> A tarai Juda la atongi mange, “Mulo oroi, i katnan koli!”

<sup>37</sup> Ika dingla onla, la mang, “I apalpalas pas a matana kutla, pa i mangasa ning bel i alangolango pas a barsan ne, sur gong i mat?”

*E Iesu i alaun pas e Lasarus*

<sup>38</sup> E Iesu i balmaris kol, ning i hanot ting na kulam a minat. A kulam a minat ning di suah alar tari ana tnan hat.

<sup>39</sup> E Iesu i atai la mange, “Mulor lakir sen a hat.” Pa e Mata, a tas a barsan ning i mat, i kelesi mange, “Leklek, kar goh, anasa ka diat a pukakiar alari!”

<sup>40</sup> E Iesu i atongi mange, “Mangasa, bel a atai nigon tar u mang, ning ur tortorot, ur oroi a matatar ane God?”

<sup>41</sup> Pa la lakir sen a hat. E Iesu i tadai usaot, pa i atongi mange, “Tata, a atong wakak tetek u, anasa u ka longor iau.

<sup>42</sup> A tasmani mang u sira longor tak, ika a warwara larne, kamkamna ana taraila ne, sur lar tortorot mang u sune iau.”

<sup>43</sup> Ning ka atong tari larne, i arkabah ana tnan elngena mange, “Lasarus, ur purum!”

<sup>44</sup> E Lasarus i purum, taum ana kaba iriris a kaen, pa ning a diah kaen otleng di poroi alar tar a patarna ono. E Iesu i atai la mange, “Mulor pak sen a kaen na minatla kusuni sur ir han.”

*La warwara taum pas sur lar umkol e Iesu  
(Matiu 26:1-5; Mak 14:1-2; Luk 22:1-2)*

<sup>45</sup> A galis a tarai Juda ning la kes napire Maria, la oroi a utna ning e Iesu i toli, pa la tortorot onoi.

<sup>46</sup> Ika dingla onla, la han tetek a Parisaiola pa la atai la ana utna ning e Iesu i toli.

<sup>47</sup> A leklek a tena artabarla tetek e God pa na Parisaio la kabah taum a tarai a kiwung, pa la deken la mange, “Dalar tol asa? A barsan ning i tol a galis a akinalangla.

<sup>48</sup> Ning dalar noreni, a taraila rop lar tortorot ono, pa tarai a harum mitumo e Rom lar hanot pa lar regen sen a rumai artabar anundala pa lar kepsen otleng anundala matanitu.”

<sup>49</sup> Ning a halinla a risana e Kaiapas, a ningnigo na tena artabar tetek e God ana rau ning, i atongi mange, “Bel mulo tastasman.

<sup>50</sup> Bel mulo tasmani mang ir wakak tetek mulo ning tik ir mat alar a tarai, sur gong a tarai Juda rop dalar hirua.”

<sup>51</sup> Bel i atong orosi ka. I warwara na propet larning, anasa i a ningnigo na tena artabar tetek e God ana rau ning. I warwara oe Iesu mang ir mat sur a tarai Juda.

<sup>52</sup> Pa bel la ka, sur a taraila rop otleng ane God ning la kes sarara ting na hananua masik, sur ir ben taum pas la sur lar takai ka.

<sup>53</sup> Ana pukakiar ot ning, a ningnigola ana tarai Juda la turpas a warwara sur al ngas sur lar umkol e Iesu.

<sup>54</sup> Suri ma i ning e Iesu bel ma i taltal na matanla. I kamtur mitingia, sur a hanua Epraim milau a hanua bel, pa la kes tingia taum ana nuna kakak a asaerla.

<sup>55</sup> Ning ka milau a lotu na Han Lakai anuna tarai Juda, a galis a tarai miting na hananuala la nigo usaot e Jerusalem, sur lar atotoh nigon pas

la na matana e God, i arlar ana toltol ana nunla lotu.

<sup>56</sup> La tatatai sur e Iesu. Ning la tur taum tar ting na rumai artabar, la deken artalai la mange, “Asa mulo nuki? Ir han ot ute ana lotu, o bel?”

<sup>57</sup> A leklek a tena artabarla pa na Parisaio la ka sarai warwara tar sur tik ning ka oroi tar e Iesu, ir atatai talapor ono mang i kes taha, sur lar tong akes pasi.

## 12

*E Maria i sang e Iesu sur a pukakiar ning ir mat pa dir akasi ting na kulam a minat (Matiu 26:6-13; Mak 14:3-9)*

<sup>1</sup> Diono na pukakiar kaning ot lanigo tana lotu na Han Lakai, e Iesu i hanot saot e Betani, a hanua ane Lasarus, a barsan ning e Iesu i alaun pasi kusun a minat.

<sup>2</sup> Pa la tol a utna na hangan na kes taum oe Iesu tingia. E Mata i susuk anlai, pa e Lasarus, ning a halinla ning la kes taum oe Iesu ana utna na hangan.

<sup>3</sup> E Maria i los pas a koto na polo na tomtoboh ning di atongi a nad, a matana i abit kol. Pa i peki ting na naur a hana e Iesu, pa i sah diau ana hihna. A tobohna i tatah tingui na rumai.

<sup>4</sup> Ning a halin a kakak a asaerla ane Iesu, e Judas Iskariot, ning ir saran tar e Iesu uting na kuna hiruala, i atongi mange,

<sup>5</sup> “Sur asa bel di siuran a tomtoboh ne sur a ngas a arlou miting na ning a rau, sur dir tabar a kapan a tarai ono?”

<sup>6</sup> Bel i maris a kapan a taraila. I atongi larne, anasa i sira tai alar anunla mani pa i sira kinau kumnani, anasa ai a tena kinkinai.

<sup>7</sup> Ning e Iesu i longor a warwara ane Judas, i kelesi mange, “Noren a hane ning, i tol a titol ne hok sur a pukakiar ning ar mat pa dir akas iau uting na kulam a minat.

<sup>8</sup> A kapan a tarai lar laun bolbolos taum omulo, ika iau bel ar kes tikin napirimulo.”

### *La wol sur lar umkol e Lasarus*

<sup>9</sup> Ning a kunum a tarai tagun a tarai Juda la longori mang e Iesu kano e Betani, la han uto. Bel la han sur lar oroi e Iesu ka, la han otleng sur lar oroi e Lasarus, ning e Iesu i alaun pasi kusun a minat.

<sup>10</sup> Pa leklek a tena artabarla la wol sur lar umkol e Lasarus otleng,

<sup>11</sup> anasa a galis a tarai Juda la han kusun la pa la tortorot oe Iesu, kamkamna oe Lasarus.

### *E Iesu i han usaot e Jerusalem lar a king (Matiu 21:1-11; Mak 11:1-11; Luk 19:28-40)*

<sup>12</sup> Ana pukakiar lamur a tnan kunum a taraila ning la hanot sur a lotu na Han Lakai, la longori mang e Iesu otleng kaning i han amon usaot e Jerusalem.

<sup>13</sup> La los pas a paka baibaila pa la han sur lar barat e Iesu. La kukuk mange,

“Hosana! Esaning i hanot ana risan a Leklek i angis. *Buk Song 118:25-26*”

A King anuna tarai Israel i angis!”

<sup>14</sup> E Iesu i ben pas a dongki, pa i kes saot onoi, larning a Buk Tabu ka atong tari ono mange,

<sup>15</sup> “A tarai Saion, gong mulo matmataut.

Oroi, anumulo a king i hanot, i kes saot na nat a dongki.”

*Sekaraia 9:9*

<sup>16</sup> A kakak a asaerla ane Iesu bel la tasmani mang a ututnala ning, di ka tumus nigon tari ting na Buk Tabu. Ika, ning e Iesu ka kes ana nuna matatar, la bot nuk lalani mang di ka tumus tar a ututnala ne oe Iesu, pa di ka tol tar a ututnala ne onoi.

<sup>17</sup> A galis a tarai ning la tur taum oe Iesu ning i kabah purum pas e Lasarus kusun a kulam a minat pa i alaun pasi, la ning la warwara talapor onoi.

<sup>18</sup> A galis a tarai la han sur lar barat e Iesu, anasa la ka longor tar a warwara ana akinalang ning.

<sup>19</sup> A Parisaiola la atai artalai la mange, “Mulo oroi, bel dalar tolsot pas ta utna ning dala mang sur dalar toli. Anasa a tarai mite na rakrakan hanua rop la ka muri.”

*A tarai Grik la mang sur lar oroi e Iesu*

<sup>20</sup> Dingla na tarai Grik otleng la han usaot e Jerusalem ana lotu na Han Lakai, sur lar lotu.

<sup>21</sup> Pa la han tetek e Pilip, a te Betsaida. E Betsaida a hanua ting na papar Galili. Pa la atai i mange, “Lak, mila mang sur milar oroi e Iesu.”

<sup>22</sup> E Pilip i han pa i atai e Endru, pa dia han sur diar atai e Iesu.

<sup>23</sup> Pa e Iesu i keles diau mange, “A pukakiar ka hanot ning dir mermer a Nat a Barsan.

<sup>24</sup> A atong momoli tamulo, ning a pat a wit bel ir punga ting na kabalapiu pa bel ir mat pas, ir kes ot larning, takai ka. Ika ning ir mat pas, ir wai pa ir suah a galis a patna.

<sup>25</sup> Esining i mang kol sur anuna lalaun, ir hirua, pa esining i nget anuna lalaun te na rakrakan hanua, ir suahi sur a lalaun tikin.

<sup>26</sup> Esining ir titol tetek iau, i wakak ning ir mur iau, pa i anuk a tena titol pa ir kes taum hok ting na pukna ning ar kes ia. Esining ir titol tetek iau, e Tata ir aleklek pasi.

### *E Iesu i warwara ana nuna minat*

<sup>27</sup> “Onone anuk a lalaun i mamahat kol. Asaning ar atongi? Mangasa, ar atongi larne, “Tata, gong u noren tar a mamahat ne ir hanot tetek iau’? Bel! Bel ar araring larne. Ine a kamkamna ning a hanot suri.

<sup>28</sup> Tata, ur aleklek a risam!”

Pa elngen takai misaot na langit i atongi mange, “Ia ka aleklek tari, par aleklek ulaki.”

<sup>29</sup> A kunum a tarai ning la tur tingia la longori. Dingla na tarai la atongi mang a pungpugur, pa dingla otleng la atongi mange, “Ning a angelo i warwara teteki.”

<sup>30</sup> Ika e Iesu i atongi mange, “A elngen takai ne bel i warwara sur ir nangan iau, sur ir nangan mulo ot.

<sup>31</sup> Onone ka taim sur dir warkurai a rakrakan hanua, pa dir alulu sen e Satan, a ningnigo mite na rakrakan hanua.

<sup>32</sup> Ika iau, ning dir akulam iau mite lapiu usaot, ar dat a taraila rop tetek iau.” \*

<sup>33</sup> I atongi larne sur ir atalapor mang ir mat mangmangasa.

<sup>34</sup> Pa kunum a tarai la atai i mange, “Mila longori ting na Buk a Warkurai mange, e Karisito ir kes tikin. Sur asa u atongi mang dir akulam a Nat a Barsan usaot? Esi a Nat a Barsan?”

<sup>35</sup> E Iesu i atai la mange, “A talapor bel ir kes kol ma napirimulo. Mulor taltal ning a talapor kanet, lamur a mormorom ir poroi alar mulo. Esining ir taltal ana mormorom bel ir tasmani mang ir han utaha.

<sup>36</sup> Ning a talapor kanet, mulor tortorot onoi, sur mulo na natnat a talapor.” Ning e Iesu ka atong arop tar a warwara ne, i kamtur pa i han kumna kusun la.

### *Dingla na tarai Juda bel la tortorot oe Iesu*

<sup>37</sup> E Iesu ka tol tar a galis a akinalang na matanla, ika bel la tortorot onoi,

<sup>38</sup> sur a warwara ning a propet Aisaia i warwara tar onoi ir hanot momol. I atongi mange,

---

**12:32: 12:32** Jon 3:14 \* **12:32: 12:32** E Iesu i warwara larlar ana nuna minat saot na rakai kutus. **12:33: 12:33** Jon 19:6 **12:34: 12:34** Buk Song 110:4; Aisaia 9:7; Daniel 7:14 **12:35: 12:35** Jon 8:12 **12:36: 12:36** Epeses 5:8

“Leklek, esi ka tortorot ana numila warwara?  
Pa esi di ka asangan tar a rakrakai anuna  
Leklek tana?” *Aisaia 53:1*

<sup>39-40</sup> Pa ka atong tari otleng manglarne,  
“E God ka bing akut tar a matanla,  
pa ka san alar tar a nuknukinla,  
sur gong la tai ana matanla,  
pa gong la tasman lalani ting na nuknukinla,  
pa bel lar talingir tetek iau,  
sur ar alaun la.” *Aisaia 6:10*

Ine a kamkamna, ning bel la tortorot.

<sup>41</sup> E Aisaia i atongi larne, anasa ka oroi tar a matatar ane Iesu, pa i warwara oe Iesu.

<sup>42</sup> Pa galis a ningnigola otleng miting na tarai Juda la tortorot oe Iesu, ika bel la warwara talapor onoi, sakana a Parisaiola lar kepsen la kusun a rumai lotula.

<sup>43</sup> Bel la warwara talapor onoi anasa la mang sur a tarai lar aleklek la, pa bel la mang kol sur e God ir aleklek la.

### *A warwarala ane Iesu ir warkurai a tarai*

<sup>44</sup> E Iesu i warwara kol mange, “Esining i tortorot hok, bel i tortorot ka hok, i tortorot otleng o esaning i sune iau ute.

<sup>45</sup> Pa esining i oroi iau, ka oroi tar esaning i sune iau ute.

<sup>46</sup> A hanot ute na rakrakan hanua lar a talapor, sur esining i tortorot hok, bel ir kes ana mormorom.

<sup>47</sup> Ning tik i longor anuk na warwara pa bel i muri, iau, bel ar warkurai i. Anasa bel a hanot

sur ar warkurai a rakrakan hanua, a hanot sur ar alauni.

<sup>48</sup> Esining i gilam ris kusun iau pa bel i kibas anuk na warwara, anuk na warwara ot ning, lar warkurai i ana ararop a pukakiar.

<sup>49</sup> Anasa a warwarala ning ia ka atong tari bel anuki, e Tata ot i sune iau ono ute sur ar atongi par atong mangmangasa i.

<sup>50</sup> A tasmani mang anuna warkuraila ir saran a lalaun tikin. A warwarala a atongi, e Tata i sune iau ono sur ar atongi.”

## 13

### *E Iesu i gos a hana kakak a asaerla anunai*

<sup>1</sup> Ning ka milau a lotu na Han Lakai, e Iesu ka tasmani mang ka milau sur ir han kusun a rakrakan hanua, pa ir han tetek e Tamana. I maris kol anuna taraila ning la kes te na rakrakan hanua, pa ine i asangan anuna tnan marmaris tetek la, a marmaris ning bel ta araropna.

<sup>2</sup> Ana morom, e Iesu pa nuna na kakak a asaer la hangan taum. Lanigo sur lar hangan, e Satan i anuknuk tar e Judas Iskariot, a nat e Saimon, sur ir saran tar e Iesu uting na kuna hiruala.

<sup>3</sup> E Iesu i tasmani mang e Tamana ka saran arop tar a ututnala rop na kuna, pa i tasmani mang i han misaot ta e God, pa ir ulak tetek e God.

<sup>4</sup> Pa i kamtur kusun a utna na hangan, i kepsen anuna kaen ning i polpol alar anuna mermer onoi, i los pas a tawol pa i dot potor pasi onoi.

<sup>5</sup> I pek pas a malum uting na besen, pa i gos a hana kakak a asaerla anunai, pa i sah sengsenge la ana tawol ning i dot potor pasi onoi.

<sup>6</sup> I han tetek e Saimon Pita, pa e Pita i dekeni mange, “Leklek, ur gos naur a hak?”

<sup>7</sup> E Iesu i kelesi mange, “A utna ne a toli bel u tasmani, ika lamur ur tasmani.”

<sup>8</sup> E Pita i atongi mange, “Gong! Gong u gos naur a hak.” E Iesu i kelesi mange, “Ning bel ar gos naur a ham, u bel a halik.”

<sup>9</sup> E Saimon Pita i kelesi mange, “Leklek, ning ur gos naur a hak, i wakak ning ur gos naur a kuk pa pukuluk otleng!”

<sup>10</sup> E Iesu i kelesi mange, “Esining ka munmun pas, a palaona rop ka toh, dir gos tar kama naur a hana. Mulo, mulo ka toh, ika bel mulo rop.”

<sup>11</sup> E Iesu i atongi lerne, “bel mulo rop mulo toh,” anasa ka tasman esaning ir saran tari uting na kuna hiruala.

<sup>12</sup> Ning ka gos tar na hanla, i suah ulak pas anuna kaen ning i kepsen tari, i kes pa i deken la mange, “Mulo tasman ot a utna ne a toli omulo?”

<sup>13</sup> Mulo atong iau mang ‘Tena Asaer’ pa ‘a Leklek’. I tostos ot anumulo na atatong, a risak ot ning.

<sup>14</sup> Iau anumulo a Leklek pa Tena Asaer, ka gos tar a hamulo, i wakak sur mulo otleng mulor gos artalai a hamulola.

<sup>15</sup> Ia ka tol tar a toltol ne tetek mulo, i wakak sur mulo otleng mulor toli larne.

<sup>16</sup> A atong momoli tamulo, a tena titol oros bel i leklek tana nuna ningnigo. Pa esining di sira sune i bel i leklek ta esaning i arsune.

<sup>17</sup> Mulo ka tasman a ututnala ne. Ning mulor toli, dir angis mulo.

<sup>18</sup> “Bel a warwara omulo rop, a tasman la ot ning ia ka aslang pas la. Ika dir tolsot pas ot asaning di ka tumus tari ting na Buk Tabu mange, ‘A barsan ning mia hangan taum ana bret, ka talingir kusun iau pa i hirua tetek iau.’

*Buk Song 41:9*

<sup>19</sup> A atai nigon tar mulo ana utna ne ning ir hanot. Pa ning ir hanot, mulor tortorot mang iau a Mesaia.

<sup>20</sup> A atong momoli tamulo, esining ir gas pas esaning a sune i, i gas pas iau. Esining ir gas pas iau, i gas pas esaning i sune iau ute.”

*E Iesu i warwara o esaning ir saran tari uting na kuna hiruala*

*(Matiu 26:20-25; Mak 14:17-21; Luk 22:21-23)*

<sup>21</sup> Ning e Iesu ka atong tari larne, i kilang a tnan mamahat ana inguna, pa i warwara talapor mange, “A atong momoli tamulo, ning a halimulo ir saran tar iau uting na kuna hiruala.”

<sup>22</sup> Na kakak a asaer la ngoson artalai la, ika bel la tasmani mang esi na halinla ning i atong a warwara ne onoi.

<sup>23</sup> Ning a kaklik asaer, ning e Iesu i katnani, i kes milau i.

<sup>24</sup> E Saimon Pita i apit kilang pas a kaklik asaer ning pa i atai i mange, “Ur deken e Iesu mang esi na halindala ning i warwara onoi.”

<sup>25</sup> A kaklik asaer ning, i tan oe Iesu pa i dekeni mange, “Leklek, esining u warwara onoi?”

<sup>26</sup> E Iesu i kelesi mange, “Esaning ar amurung pas a diah bret te na besen par sarani tana, i ka.” Pa i amurung pas a diah bret, pa i sarani ta e Judas Iskariot, a nat e Saimon.

<sup>27</sup> Ning e Judas i kibas pas a bret, e Satan i kas kakat ono. E Iesu i atai e Judas mange, “Asaning u mang sur ur toli, ur tol kapiti.”

<sup>28</sup> Ika bel tik ta halinla ning la kes ana utna na hangan i tasman lalan asa kamkamna ning e Iesu i atongi larne tana.

<sup>29</sup> E Judas i sira tai alar anunla na mani. Pa dingla na kakak a asaer la nuki mang e Iesu i atai i sur ir lou al utna ning la kapan suri ting na tnan lotu. Dingla otleng la nuki mang e Iesu i atai i sur ir tabar a kapan a taraila.

<sup>30</sup> Ning e Judas ka los pas a diah bret, i purum kakat. Ka morom.

### *A tona warkurai*

<sup>31</sup> Ning e Judas ka han, e Iesu i atai la mange, “Onone dir apuasa a matatar a Nat a Barsan, pa Nat a Barsan ir apuasa otleng a matatar e God.

<sup>32</sup> Ning a Nat a Barsan ir apuasa a matatar e God, e God ir apuasa a matatar a Nat a Barsan. Ono otne e God ir apuasa a matatarna.

<sup>33</sup> “Na natnatuk, bel ma ar kes kol napirimulo. Mulor tai sur iau. A warwara ia ka atai tar a tarai Juda, onone ar atai mulo otleng mange, ‘A hanua ning ar han suri, bel mulo tolsot sur mulor han tingia.’

<sup>34</sup> A saran a tona warkurai tetek mulo mange, mulor mang artalai sur mulo. Mulor mang artalai sur mulo larning a mang sur mulo.

<sup>35</sup> Ning mulor mang artalai sur mulo, a taraila rop lar tasmani mang mulo anuk na kakak a asaer.”

*E Iesu i warwara nigo oe Pita mang ir puain seni (Matiu 26:31-35; Mak 14:27-31; Luk 22:31-34)*

<sup>36</sup> E Saimon Pita i dekeni mange, “Leklek, ur han utaha?” E Iesu i kelesi mange, “A hanua ning ar han tingia, onone bel u tolsot sur han tingia, ika lamur ur mur iau.”

<sup>37</sup> E Pita i dekeni mange, “Leklek, sur asaning bel ar mur u onone? A sang sur ar saran anuk a lalaun sur u.”

<sup>38</sup> E Iesu i kelesi mange, “Mangasa, i momol ot ning ur saran anum a lalaun sur iau? A atong momoli tam, ning a kakaruk belot ir kurkurirakuk, ur puai munatol mang bel u tasman iau.”

## 14

*E Iesu a ngas tetek e Tamana*

<sup>1</sup> E Iesu i atai la mange, “Gong mulo nuknuk kol. Mulor tortorot oe God, pa mulor tortorot otleng hok.

<sup>2</sup> Ting na rumai ane Tata, a galis a rum. Ning bel, ar atai mulo otleng ono. Ar han sur ar sang tar a pukna sur mulo.

<sup>3</sup> Ning ia ka sang tar a pukna sur mulo, ar ulak, par ben pas mulo tetek iau, sur mulo otleng mulor kes ting na hanua ning ar kes ia.

<sup>4</sup> Mulo tasman ot a ngas uting na hanua ning ar han utingia.”

<sup>5</sup> E Tomas i atai i mange, “Leklek, bel mila tasman a hanua ning ur han utingia, pa milar tasman mangmangasa a ngas utingia?”

<sup>6</sup> E Iesu i kelesi mange, “Iau a ngas, pa iau a momolna, pa iau a lalaun. Bel tik ir han tetek e Tata ana ta ngas masak, hok ka.

<sup>7</sup> Ning mulo tasman momol iau, mulor tasman e Tata otleng. Pa onone mulo ka tasmani, pa mulo ka oroi.”

<sup>8</sup> E Pilip i atai i mange, “Leklek, ur asangan tar e Tamam tamila, i ka ning mila mang suri.”

<sup>9</sup> E Iesu i kelesi mange, “Pilip, ia ka kes kol taum omulo, pa belot u tasman iau? Esining ka oroi iau, ka oroi tar e Tata. Sur asa u atongi mang ar asangan tar e Tata tamulo?

<sup>10</sup> Bel u tortorot mang iau kaning oe Tata, pa e Tata kane hok? A warwarala ning a atongi tamulo, bel anuki. E Tata ning kane hok i tol anuna titol.

<sup>11</sup> Mulor tortorot hok ning a atongi mang iau kaning oe Tata, pa e Tata kane hok. Ning bel mulo tortorot ana nuk a warwara, mulor

tortorot ka hok kamkamna ana ututnala ning a toli.

<sup>12</sup> “A atong momoli tamulo, esining i tortorot hok, ir tol a ututnala larning a sira toli, pa ir tol a tatatnan utna tana ututnala ning ia ka tol tari, anasa ar han tetek e Tata.

<sup>13</sup> Pa ututnala rop ning mulo nunungi ana risak, ar tolsot pasi, sur e Natnalik ir apuasa a matatar oe Tamana.

<sup>14</sup> Ning mulo araring sur ta utna ana risak, ar tolsot pasi.

### *E Iesu i atongi mang ir sune purum a Talngan Tabu*

<sup>15</sup> “Ning mulo mang sur iau, mulor mur anuk na warkuraila.

<sup>16</sup> Par nunung e Tata, pa ir sune ning a Tena Arnangai otleng tetek mulo, sur ir kes tikin taum omulo,

<sup>17</sup> a Talngan Tabu na momolna. A taraila mite na rakrakan hanua bel la maling pasi, anasa bel la oroi lalani pa bel la tasmani. Ika mulo, mulo tasman a Tena Arnangai anasa i kes taum omulo pa ir kes omulo.

<sup>18</sup> Ning ar han kusun mulo, bel mulor kes na biasui, ar ulak ka tetek mulo.

<sup>19</sup> “Bel ma i bongnani, sur a taraila mite na rakrakan hanua bel lar oroi iau. Ika mulo, mulor oroi iau. Mulor laun anasa a laun.

---

**14:12:** 14:12 Mak 16:19-20    **14:13:** 14:13 Matiu 7:7; Jon 15:16  
**14:15:** 14:15 Jon 15:10; 1 Jon 5:3    **14:16:** 14:16 Jon 14:26; 15:26;  
 16:7    **14:17:** 14:17 Jon 16:13

<sup>20</sup> Ana pukakiar ning ar laun ulak kusun a minat, mulor tasmani mang iau kaning oe Tata, pa mulo otleng kane hok, pa iau kaning omulo.

<sup>21</sup> Esining i tong akes anuk na warkurai pa i muri, i ning i mang sur iau. Pa e Tata ir mang suri, pa iau otleng ar mang suri, par asangan iau tana.”

<sup>22</sup> E Judas (bel e Judas Iskariot) i deken e Iesu mange, “Leklek, sur asaning ur asangan tar u tamila ka, pa bel tana taraila te na rakrakan hanua?”

<sup>23</sup> E Iesu i kelesi mange, “Ning tik ir mang sur iau, ir longor ana nuk na asaer. Pa e Tata ir mang suri, pa miar han teteki, pa miar kes taum onoi.

<sup>24</sup> Ika esining bel i mang sur iau, bel ir longor ana nuk na asaer. A warwarala ning mulo longori bel anuki, anun e Tata, ning i sune iau.

<sup>25</sup> “A atong a warwarala ne tamulo ning kanet a kes napirimulo.

<sup>26</sup> A Tena Arnangai, a Talngan Tabu, ning e Tata ir sune i ana risak, ir asaer mulo ana ututnala rop, pa ir anuknuk mulo ana warwarala ning ia ka atai tar mulo ono.

<sup>27</sup> A saran a balmolmol tetek mulo, anuk a balmolmol ning a tabar mulo ono. Bel a tabar mulo larning a rakrakan hanua i artabar. Gong mulo nuknuk kol, pa gong mulo matmataut.

<sup>28</sup> “Mulo ka longor tar asaning ia ka atong tari mang, ‘Ar han pas par ulak tetek mulo.’ Ning mulo mang sur iau, mulor gas mang ar han tetek e Tata, anasa i leklek tak.

<sup>29</sup> Ia ka atai nigon tar mulo ana ututnala ning lamur ir hanot, pa ning ka hanot, mulor tortorot.

<sup>30</sup> “Bel ma ar awara kol mulo, anasa e Satan, a ningnigo mite na rakrakan hanua, milau ir hanot. Bel al rakrakaina sur ir tol ta utna hok,

<sup>31</sup> ika ar tolsot arop pas a ututnala ning e Tata i sune iau sur ar toli, sur a rakrakan hanua ir tasmani mang a mang sur e Tata.

“Mulor tur pa dala kar han.”

## 15

### *E Iesu ot a rakai a wain*

<sup>1</sup> E Iesu i atongi mange, “Iau a rakai a wain momol, pa e Tata a tena tai alar.

<sup>2</sup> I ting arop sen a rakrakanala hok ning bel la wai, pa i buri sen la rop ning la wai, sur lar wai kol.

<sup>3</sup> Mulo ka toh anasa ana warwara ning ia ka atong tari tamulo.

<sup>4</sup> Mulor patap hok, pa iau ar patap omulo. Bel mulor wai ning bel mulo patap hok, arlar ana rak a wain, bel ir wai oros ka, ning bel i patap ana rakaina.

<sup>5</sup> “Iau ot a rakai a wain, pa mulo a rakrakanala. Esining i patap hok, pa a patap onoi, ir wai kol. Ika ning mulo laun masik kusun iau, bel mulor tolsot pas ta utna.

<sup>6</sup> Ning tik bel i patap hok, i arlar ana rak a rakai ning di migen seni pa ir marang. Dir suah taum la, pa dir migeni ting na iah, sur lar sot rop.

<sup>7</sup> Ning mulo patap hok, pa anuk a warwara ir laun omulo, mulor nunung sur ta utna mulo mang suri, pa dir sarani ot tamulo.

<sup>8</sup> “Ning mulor wai kol, mulor apuasa a matatar e Tata, pa waimulo ir asangani mang mulo anuk na kakak a asaerla.

<sup>9</sup> E Tata i mang sur iau, larning iau otleng a mang sur mulo. Mulor laun ana nuk a marmaris.

<sup>10</sup> Ning mulo longor ana nuk na warkurai, mulor laun ana nuk a marmaris, larning a longor ana warkuraila ane Tata, pa a laun ana nuna marmaris.

<sup>11</sup> “A atong a warwarala ne tamulo, sur anuk a gasgas ir kes omulo, pa anumulo a gasgas ir bukus momol.

<sup>12</sup> Ine anuk a warkurai tetek mulo: Mulor mang artalai sur mulo, larning a mang sur mulo.

<sup>13</sup> Ning tik i saran anuna lalaun sur ir mat sur na halalna, anuna marmaris i itna kol. Bel al marmaris anuna tik i arlar ono.

<sup>14</sup> Mulo na halalik ning mulo longor ana nuk na warkuraila.

<sup>15</sup> Bel a atong ulak mulo mang a tena titol orosla, anasa a tena titol oros bel i tasman a utna ning anuna ningnigo i toli. Ika a atong mulo na halalik, anasa ia ka atong arop tar a warwarala tamulo ning a longori ta e Tata.

<sup>16</sup> Bel mulo aslang pas iau, iau ot a aslang pas mulo. Pa a saran a titol tamulo sur mulor han pa mulor wai, pa waimulo ir kes tikin. Pa e Tata ir

tabar mulo ana saning mulo araring suri ana risak.

<sup>17</sup> Ine anuk a warkurai: Mulor mang artalai sur mulo.

*A taraila mite na rakrakan hanua lar nget mulo*

<sup>18</sup> “Ning a taraila mite na rakrakan hanua lar nget mulo, mulor nuk pasi mang la nget nigon iau.

<sup>19</sup> Ning mulo mite na rakrakan hanua, lar mang sur mulo larning mulo anunlai. Ika mulo bel mite na rakrakan hanua, ia ka aslang pas mulo kusuni. Ine a kamkamna ning a taraila mite na rakrakan hanua la nget mulo.

<sup>20</sup> Mulor nuk pas a warwara ning ia ka atong tari tamulo mange, ‘A tena titol oros bel i leklek tan anuna ningnigo.’ Ning la alaulau iau, lar alaulau mulo otleng. Ning la longor ana nuk na warwara, lar longor otleng ana numulo na warwara.

<sup>21</sup> Lar alaulau mulo anasa mulo anuki, anasa bel la tasman esaning i sune iau ute.

<sup>22</sup> “Ning bel ar hanot pa bel ar warwara tanla, bel dir tiu la ana nunla na toltol laulaula, pa lar langolango. Ika onone, bel al warwara anunla sur lar alar la onoi kusun anunla na toltol laulau.

<sup>23</sup> Esining i nget iau, i nget e Tata otleng.

<sup>24</sup> Ia ka tol tar a titolla ning bel tik i tolsot tari. Ning bel ar tol tar al titol ne tanla, bel dir tiu la ana nunla na toltol laulau pa lar langolango. Pa onone, la ka oroi tar a titolla ning a toli, ika la nget mia rop ma e Tata.

<sup>25</sup> Di toli lerne, sur dir tolsot pas a warwara ning di ka tumus tari ting na Buk a Warkurai mange, ‘La nget iau, pa bel ta kamkamna.’ *Buk Song 35:19*

<sup>26</sup> “Ar sune a Tena Arnangai tetek mulo misaot ta e Tata, i a Talngan Tabu na momolna. Ning ir hanot ir warwara talapor hok.

<sup>27</sup> Pa mulo otleng mulor warwara talapor hok, anasa mulo kes taum hok ana nuk a kamkama titol tuk onone.

## 16

<sup>1</sup> “A atong a warwarala ne tamulo sur gong a tortorot anumulo ir punga.

<sup>2</sup> Lar sairas mulo kusun a rumai lotula. A taim ir hanot lamur, ning a tarai ning lar umkol mulo, lar nuki mang la tol a titol ane God.

<sup>3</sup> A tarai lar tol a ututnala ne tetek mulo, anasa bel la tasman miau ma e Tata.

<sup>4</sup> A atai tar mulo ana warwarala ne, sur ning ir hanot, mulor tasmani mang ia ka atumarang nigon tar mulo. Ana kamkama nuk a titol, bel a atai tar mulo ana warwarala ne, anasa kanet a kes taum omulo.

### *A titol anuna Talngan Tabu*

<sup>5</sup> “Onone, ar han tetek esaning i sune iau ute. Ika bel tik ta halimulo i deken iau mang, ‘Ur han utaha?’

<sup>6</sup> Mulo balmaris kol anasa a atai mulo ana warwarala ne.

<sup>7</sup> A atong momoli tamulo mang, ir wakak tetek mulo ning ar han. Ning bel ar han, a Tena Arnangai bel ir hanot tetek mulo. Ika ning ar han, ar sune i ute tetek mulo.

<sup>8</sup> “Ning ir hanot, ir asangan a taraila te na rakrakan hanua ana toltol laulau, pa ana tostosna pa ana warkurai ane God.

<sup>9</sup> Ir asangan la ana toltol laulau anasa bel la tortorot hok.

<sup>10</sup> Pa ir asangan la otleng ana tostosna, anasa ar han tetek e Tata pa bel mulor oroi ulak iau.\*

<sup>11</sup> Pa ir asangan la otleng ana warkurai ane God anasa e God ka warkurai tar a ningnigo mite na rakrakan hanua.

<sup>12</sup> “A galis a utna ning ar atongi tamulo, ika onone bel mulor nuk lalani.

<sup>13</sup> Ning a Talngan Tabu na momolna ir hanot, ir atalapor mulo ana momolna rop. A warwarala ning ir atongi bel anunai, ir atong ka a warwarala ning i longori, pa ir atai mulo ana ututnala ning ir hanot lamur.

<sup>14</sup> Ning ir los pas anuk na warwara pa ir atai mulo onoi, ir apuasa a matatarik.

<sup>15</sup> A ututnala rop ning ane Tata, anuki. Ine a kamkamna ning a atongi mang a Talngan Tabu ir los pas anuk na warwara pa ir atai mulo onoi.

### *A balmaris pa gasgas*

---

**16:7: 16:7** Jon 14:16    \* **16:10: 16:10** A tarai la atongi mang e Iesu ir mat anasa i tol a toltol ning bel i tostos. Ika e God i akamtur ulaki kusun a minat pa i ben kas pasi teteki. A titol ne i asangani mang e Iesu i tol ka a tostosna.    **16:11: 16:11** Jon 12:31    **16:12: 16:12** 1 Korin 3:1-2

16 “Bel ir bongnani, pa bel mulor oroi iau. Pa bel ir bongnani kale, mulor oroi iau.”

17 Anuna dingla na kakak a asaer la deken artalai la mange, “Esi na kamkamna ana nuna warwara ne, bel ir bongnani pa bel dalar oroi, pa bel ir bongnani kale dalar oroi? Pa ning a warwara otleng anunai ne, anasa ir han tetek e Tamana?”

18 Esi na kamkamna ana nuna warwara ne ‘bel ir bongnani’? Bel dala tasman a utna ne i warwara onoi!”

19 E Iesu i tasmani mang la mang sur lar dekeni, pa i atai la, “A atong tari mange, ‘Bel ir bongnani bel mulor oroi iau, pa bel ir bongnani kale mulor oroi iau.’ I mangasa, a warwara ne mulo deken artalai mulo onoi?”

20 A atong momoli tamulo, mulor balmaris pa mulor domos, ika a taraila mite na rakrakan hanua lar gas. Mulor balmaris, ika lamur anumulo a balmaris ir keles sur a gasgas,

21 arlar ana hane ning i milau sur ir agon, i kilang a tnan kankan, ika, ning ka agon sen tar a kaklik, ir duman sen a kankan pa ir gas, anasa ka agon tar a kaklik ute na rakrakan hanua.

22 Mang otleng larning tetek mulo, onone mulo balmaris, ika ar oroi ulak mulo, pa mulor gas. A gasgas ne, bel tik ir kepseni kusun mulo.

23 “Ana pukakiar ning, bel mulor deken ulak iau ana ta utna. A atong momoli tamulo, e Tata ir tabar mulo ana saning mulo araring suri ana risak.

<sup>24</sup> Tuk onone, bel mulo nunung sur ta utna ana risak. Mulor nunung pa dir tabar mulo, sur anumulo a gasgas ir bukus momol.

*E Iesu i tolsot pas a rakrakai mite na rakrakan hanua*

<sup>25</sup> “A atong a warwarala ne tamulo ana warwara larlar, ika a taim ir hanot ning bel ar warwara ulak tetek mulo ana warwara larlar, ar atai talapor mulo oe Tata.

<sup>26</sup> Ana pukakiar ning, mulor nunung ana risak. Bel a atongi mang iau ar nunung e Tata sur ir nangan mulo,

<sup>27</sup> anasa e Tata ot i mang sur mulo. I mang sur mulo anasa mulo mang sur iau, pa mulo tortorot mang a han misaot ta e God.

<sup>28</sup> Ia ka han pas misaot ta e Tata, pa a han ute na rakrakan hanua. Pa onone, ar han kusun a rakrakan hanua, par ulak tetek e Tata.”

<sup>29</sup> Anuna kakak a asaer la atai i mange, “Onone bel u warwara ana warwara larlar, u bot warwara talapor.

<sup>30</sup> Onone mila ka tasmani mang u tasman a ututnala rop. Bel u kapan sur tik ir deken u anal deke, anasa u ka tasman arop tar a nuknukimila. Onone mila bot tortorot mang u han misaot ta e God.”

<sup>31</sup> E Iesu i atai la mange, “Mulo bot tortorot?

<sup>32</sup> A taim ir hanot, pa ka hanot, sur dir asarara mulo kusun iau, pa mulor han uting na numulo na hananuala, pa iau kama ar kes. Ika bel iau ka ar kes, miau ot ma e Tata.

<sup>33</sup> “A atong a warwarala ne tamulo sur mulor laun te hok pa balmolmol ir kes omulo. Te na rakrakan hanua, mulor kilang a mamahat. Ika gong mulo matmataut, anasa ia ka tolsot pas a rakrakai mite na rakrakan hanua.”

## 17

### *E Iesu i araring sur anuna kakak a asaerla*

<sup>1</sup> Ning e Iesu ka atong arop tar a warwarala ne, i tai usaot na langit, pa i atongi mange,

Tata, a taim ka hanot, ur apuasa a matatar e Natumlik, sur e Natumlik ir apuasa a matatarim.

<sup>2</sup> U saran tar a warkurai tak sur a taraila rop lar kes nahaik, sur ar saran a lalaun tikin tanla rop ning u saran tar la tak.

<sup>3</sup> A lalaun tikin i manglarne: A tarai lar tasman u, ning u ka a God momol, pa lar tasman otleng e Iesu Karisito, ning u sune i ute.

<sup>4</sup> Ia ka asangan tar a matatarim te na rakrakan hanua, ana titolla ning ia ka tol arop tari. A titolla ning u sune iau ono.

<sup>5</sup> Tata, onone, ning ar kes taum ulak hom, ur apuasa a matatarik. A matatar ning nating kane hok pa kaning hom, ning belot di akes a rakrakan hanua.

<sup>6</sup> La ning u ka aslang pas la kusun a rakrakan hanua, pa u saran tar la tak, ia ka atalapor tar u tetek la. La anumi pa u saran tar la tak, pa la ka mur anum na warwara.

<sup>7</sup> Onone la ka tasmani mang a ututnala rop ning u saran tari tak, i hanot misaot tam.

<sup>8</sup> Ia ka atai tar la ana warwarala ning u saran tari tak, pa la ka kibasi. Pa la tasman momoli mang a hanot misaot tam, pa la ka tortorot mang u sune iau ute.

<sup>9</sup> A araring sur la. Bel a araring sur a taraila mite na rakrakan hanua, a araring sur la ning u saran tar la tak, anasa la anumi.

<sup>10</sup> La ning anuki, anumi, pa la ning anumi, anuki. Pa la ka apuasa a matatarik.

<sup>11</sup> Onone ar han tetek u, bel ma ar kes te na rakrakan hanua, ika la, kanet na rakrakan hanua. Tata u totoh, ur tai alar la ana rakrakai a risam, a risam ning u sarani tak. Ur tai alar la sur lar takai ka, larning dau takai ka.

<sup>12</sup> Ning a kes taum onla, a tai alar la ana rakrakai a risam, ning u saran tari tak, pa bel tik ta halinla i hirua. Takai sot ka i hirua, esaning ir han sur a hinirua tikin. Larning, a warwara ning di ka tumus tari ting na Buk Tabu ir hanot momol.

<sup>13</sup> Onone ar han tetek u, ika a atong a warwarala ne ning kanet a kes te na rakrakan hanua, sur anuk a tnan gasgas ir bukus ting na nunla lalaun.

<sup>14</sup> Ia ka atong tar anum a warwarala tanla, pa rakrakan hanua i nget la, anasa bel la mite na rakrakan hanua, larning iau otleng, bel iau mite na rakrakan hanua.

<sup>15</sup> Bel a araring sur ur kepsen la kusun a rakrakan hanua. A araring sur ur tai alar la

kusun a Tena Laulau.

<sup>16</sup> Bel la mite na rakrakan hanua, larning iau otleng, bel iau mite na rakrakan hanua.

<sup>17</sup> Anum a warwara i momol. Ur atotoh la ana num a momolna sur la anumi.

<sup>18</sup> A sune la uting na rakrakan hanua larning u sune iau otleng ute na rakrakan hanua.

<sup>19</sup> A saran tar iau tam, sur la otleng anum a tarai ana momolna.

<sup>20</sup> Bel a araring ka sur la. A araring otleng sur la ning lamur lar tortorot hok, anasa ana warwara talapor anuna tena tortorotla.

<sup>21</sup> Tata, a araring mang la rop ning la tortorot hok, lar takai ka, larning u kane hok pa iau kaning hom. I wakak sur la kane ondau, sur a taraila te na rakrakan hanua lar tortorot mang u sune iau.

<sup>22</sup> A saran tar a matatar tanla, a matatar ning u saran tari tak, sur lar takai ka, larning dau takai ka.

<sup>23</sup> Iau kaning onla, pa u kane hok, sur lar takai kama, sur a taraila te na rakrakan hanua lar tasmani mang u sune iau ute, pa u mang sur la larning u mang sur iau.

<sup>24</sup> “Tata, la ning u ka saran tar la tak, a mang sur lar kes taum hok ting na hanua ning ar kes ia, sur lar oroi a matatarik, ning u saran tari tak, anasa u mang sur iau nating ot ning belot di akes a rakrakan hanua.

<sup>25</sup> Tata, u tostos, a taraila te na rakrakan hanua bel la tasman u, ika iau, a tasman u, pa anuk na tarai a asaer la tasmani mang u sune iau ute.

<sup>26</sup> Ia ka atalapor tar u tetek la, pa bel ar manah ana warwara tetek la, sur lar tasman u, pa marmaris ning u mang sur iau onoi, ir kes onla pa iau otleng kaning onla.”

## 18

*E Judas i ben a tarai a harum tetek e Iesu  
(Matiu 26:47-56; Mak 14:43-50; Luk 22:47-53)*

<sup>1</sup> Ning e Iesu ka araring pas, i ben pas anuna kakak a asaerla, pa la lakai a natar a malum Kidron. Ting na ning a ris a malum, a barim a rakai oliw kaning ia, pa la han kas tingia.

<sup>2</sup> E Judas, ning i saran tar e Iesu na kuna hiruala, i tasman a pukna ning, anasa a galis a pukakiar e Iesu taum ana nuna kakak a asaer la sira han taum tingia.

<sup>3</sup> Pa e Judas i nigon pas a tena harumla anuna tarai Rom, taum ana tena tai alarla miting na rumai artabar. A leklek a tena artabarla pa Parisaiola la sune sen la. La los a ututnala na harum, a lamla pa ututnala ning i sot sur lar sulu talapor la ono. Pa la hanot ting na barim.

<sup>4</sup> Ika e Iesu ka tasman a ututnala rop ning ir hanot teteki, pa i han tetek la, pa i deken la mange, “Esining mulo tai suri?”

<sup>5</sup> La kelesi mang, “E Iesu a te Nasaret.” E Iesu i atongi mange, “Iau ka ne.” Pa e Judas, ning ir saran tar e Iesu na kuna hiruala, kaning ot i tur taum onla.

<sup>6</sup> Ning e Iesu i atai la mange, “Iau ka ne,” la suahi utumo lamur, pa la punga ting lapiu.

<sup>7</sup> E Iesu i deken ulak la mange, “Esining mulo tai suri?” La kelesi mange, “E Iesu a te Nasaret.”

<sup>8</sup> E Iesu i keles la mange, “Ia ka atai tar mulo mang, iau ka ne. Ning mulo tai ot sur iau, mulor noren sen a tarai ne lar han.”

<sup>9</sup> E Iesu i atongi lerne sur dir tolsot pas a warwara ning ka atong tari mange, “Tata, la rop ning u saran tar la tak, bel ta halinla i hirua.”

<sup>10</sup> E Saimon Pita i los ot anuna liwan a harum. I dat pasi pa i umsem ana sot a talngana e Malkus, ning a tena titol oros anuna ningnigo na tena artabar tetek e God.

<sup>11</sup> E Iesu i atai e Pita mange, “Akas ulak anum a liwan ting na ngasna. Mangasa, bel ar gang ana kap a mamahat ning e Tata i saran tari tak?”

### *La ben e Iesu tetek e Anas*

<sup>12</sup> A tena harumla mitumo e Rom taum ana nunla ningnigo, pa tena tai alarla miting na rumai artabar anuna tarai Juda, la tong akes pas e Iesu, pa la dot akes naur a kuna.

<sup>13</sup> Pa la ben nigoni tetek e Anas, ning dia anmuna ma e Kaiapas, a ningnigo na tena artabar tetek e God ana rau ning.\*

<sup>14</sup> E Kaiapas, esaning i atai a tarai Juda mang i wakak sur tik ir mat alar a taraila rop.

### *A ningnigo na puai ane Pita*

*(Matiu 26:69-70; Mak 14:66-68; Luk 22:55-57)*

<sup>15</sup> E Saimon Pita pa ning a kaklik asaer otleng dia han namur e Iesu. Pa ningnigo na tena artabar i tasman a kaklik asaer, ning dia han

---

**18:9: 18:9** Jon 17:12    **18:11: 18:11** Mati u 26:39    \* **18:13: 18:13**  
E Anas pa e Kaiapas, dia rop di atong diau mang a ningnigo na tena artabar tetek e God.    **18:14: 18:14** Jon 11:49-51

taum ma e Pita. A kaklik asaer ning i han taum oe Iesu utingui na pukna anuna ningnigo ning.

<sup>16</sup> Ika e Pita i harnanai tumo lapiu na taman. Pa kaklik asaer ning a ningnigo i tasmani, i ulak, pa i warwara tetek a basbas ning i tai alar a taman, sur ir sapang pas e Pita.

<sup>17</sup> A basbas ning i deken e Pita mange, “U otleng ning a hala kakak a asaerla anuna barsan ne, ge?” E Pita i kelesi mange, “Iau bel.”

<sup>18</sup> A morom ning i kotkoto kol. Pa tena titol orosla taum ana tena tai alarla miting na rumai artabar, la sur taum a barangla, la tur talilis pasi pa la marmarim. E Pita otleng i tur taum onla pa i marmarim.

*E Iesu i tur na matana e Anas  
(Matiu 26:59-66; Mak 14:55-64; Luk 22:66-71)*

<sup>19</sup> E Anas, a ningnigo na tena artabar tetek e God i deken e Iesu ana nuna kakak a asaerla pa asaerla ning i sira asaer a taraila onoi.

<sup>20</sup> E Iesu i kelesi mange, “Ia ka warwara talapor na matana taraila rop, pa a sira asaer la ting na rumai lotula pa ting na rumai artabar ning a tarai Juda la sira han taum tingia. Bel a atong kumnan tar ta utna.

<sup>21</sup> Gong u deken iau. Ur deken a taraila ning la sira longor iau. La tasman a ututnala ning a atong tari.”

<sup>22</sup> Ning e Iesu i atongi larning, ning a hala tena tai alarla i pasar a patarna, pa i atai i mange, “Sur asa u keles a warwara anuna ningnigo na tena artabar larning?”

<sup>23</sup> E Iesu i kelesi mange, “Ning ia ka atong tar ta utna i rongo, ur atong talapori tetek a taraila rop ne. Ika ning a atong a momolna, sur asa u pasar iau?”

<sup>24</sup> E Anas i sune seni tetek e Kaiapas, ning a ningnigo otleng na tena artabar tetek e God. Ika bel di pak sen naur a kuna.

### *E Pita i puain ulak sen e Iesu*

*(Matiu 26:71-75; Mak 14:69-72; Luk 22:58-62)*

<sup>25</sup> Ning e Pita kaning ot i marmarim, la dekeni mange, “U otleng ning a hala nuna kakak a asaerla, ge?” E Pita i puai mange, “Iau bel.”

<sup>26</sup> Ning a tena titol oros anuna ningnigo na tena artabar, a maina esaning e Pita i umsem a talngana, i atongi mange, “Ngandek u ka, anasa a oroi taum tar mu ma e Iesu saot na barim a rakai oliw?”

<sup>27</sup> E Pita i puai ulak mange, “Bel.” Pa ono otning, a kakaruk i kurkurirakuk.

### *E Iesu i tur na matana e Pailat*

*(Matiu 27:1-2, 11-14; Mak 15:1-5; Luk 23:1-5)*

<sup>28</sup> Ana kobot ning ot, di ben pas e Iesu miting na rumai ane Kaiapas sur uting na tnan rumai ane Pailat, a ningnigo ana matanitu Rom. A tarai Juda bel la mang sur lar kas ting na nuna rumai, anasa la ka atotoh pas la sur lar hangan ana utna na hangan na Han Lakai. Pa esining ir kas tetek tik, ning bel a te Juda, ir dur na matana e God.

<sup>29</sup> E Pailat i purum tetek la pa i deken la mange, “Mulo tiu a barsan ne ona sa?”

<sup>30</sup> Pa la kelesi mange, “A barsan ne, ning bel ir tol ta rongo, bel milar sarani tam sur ur warkurai i.”

<sup>31</sup> E Pailat i atai la mange, “Mulor ben pasi, pa mulo ot mulor warkurai i arlar ana numulo na warkurai.” A tarai Juda la atai i mange, “I tabu sur milar umkol tik.”

<sup>32</sup> A utna ne i hanot sur dir tolsot pas a warwara ane Iesu, ning ka atong nigon tari ana nuna ngas a minat.

<sup>33</sup> Lamur e Pailat i kas ulak, i kabah pas e Iesu, pa i dekeni mange, “U a king anuna tarai Juda?”

<sup>34</sup> E Iesu i kelesi ka ana kabah mange, “Mangasa, u ot u atong iau larning, o la atai u ka hok?”

<sup>35</sup> E Pailat i keles e Iesu mange, “Bel iau a te Juda. Anum a taraila pa leklek a tena artabarla tetek e God, la ot ning la saran tar u tetek iau sur ar warkurai u. Asaning u ka tol tari?”

<sup>36</sup> E Iesu i kelesi mange, “Anuk a matanitu bel mite na rakrakan hanua. Ning anuk a matanitu mite na rakrakan hanua, anuk na tena titol lar harum alar iau kusun a warkurai anuna tarai Juda. Ika anuk a matanitu bel mite.”

<sup>37</sup> E Pailat i dekeni mange, “I momol ot, u a king?” E Iesu i kelesi mange, “I momol ot ning u atongi mang iau a king. Di agon iau, pa a hanot te na rakrakan hanua, sur ar warwara talapor ana momolna. La rop ning la mur a momolna, la longor a elngek.”

<sup>38</sup> Pa e Pailat i dekeni mange, “Asaning a momolna?”

*Di malmaling sur dir sai ahah e Iesu saot na rakai kutus (Matiu 27:15-31; Mak 15:6-20; Luk 23:13-25)*

Ning e Pailat ka deken tari larne, i purum ulak tetek a tarai Juda. I atai la mange, “Bel a pastek anuna ta rongo.

<sup>39</sup> Ika, ning a toltol a sira toli tetek mulo, ana raula rop ana lotu na Han Lakai, a sira pak sen ta mainla ning i kes ting na karabus, tetek mulo. Mangasa, mulo mang sur ar pak sen a ‘king anuna tarai Juda’ tetek mulo?”

<sup>40</sup> La kukuk kelesi mange, “Gong! Gong e Iesu. Paksen e Barabas!” E Barabas a tnan tena laulau.

## 19

<sup>1</sup> E Pailat i arsune sur lar ben masik pas e Iesu pa lar mirasi ana inau a harum.

<sup>2</sup> A tarai a harum la iris pas a inau ning a suksukna pa la suahi ana pukulna arlar ana kukuh anuna king, pa la apipisi ana pepol a kaen.\*

<sup>3</sup> La ululak teteki, pa la atai i mange, “U a king anuna tarai Juda!” Pa la paspasar a patarna.

<sup>4</sup> E Pailat i purum ulak pa i atai la mange, “Mulo oroi, a ben purum tari na matamulo, sur mulor tasmani mang, bel a pastek anuna ta rongo.”

<sup>5</sup> Ning e Iesu i purum, di ka suah tar a inau ning a suksukna ting na pukulna, pa di ka apipisi tari ana pepol a kaen. E Pailat i atai la mange, “Mulo oroi a barsan ne!”

---

**19:2: 19:2** Luk 23:11 \* **19:2: 19:2** A ngas a kukuh ning, pa pepol a kaen dia arlar ana mermer ana king.

<sup>6</sup> Ning a leklek a tena artabarla tetek e God, pa tena tai alarla miting na rumai artabar la oroi e Iesu, la kukuk mange, “Sai ahati saot na rakai kutus! Sai ahati saot na rakai kutus!” E Pailat i atai ulak la mange, “Mulor ben pasi, sur mulo ot mulor sai ahati saot na rakai kutus. Ika iau, bel a pastek anuna ta rongo.”

<sup>7</sup> A tarai Juda la kelesi mange, “Anumila warkurai i mange, dir umkoli, anasa i iaunani mang ai a Nat e God.”

<sup>8</sup> Ning e Pailat i longor a warwara ne, i matmataut kol.

<sup>9</sup> I kas ulak utisau, pa i deken e Iesu mange, “U mitaha?” Ika e Iesu bel i kelesi.

<sup>10</sup> E Pailat i atai i mange, “Mangasa, bel u mang sur ur keles iau? Bel u tasmani mang a tong akes a warkurai sur ar alangolango sen u, o ar sai ahat u saot na rakai kutus?”

<sup>11</sup> E Iesu i kelesi mange, “U tolsot sur ur warkurai iau, anasa e God i saran tar a rakrakai tam. Ika esaning i saran tar iau tetek u sur ur warkurai iau, anuna toltol laulau i laulau kol tan anum a toltol laulau.”

<sup>12</sup> Ning e Iesu i atong tari larning, e Pailat i tohoi sur ir alangolango seni. Ika a tarai Juda la kukuk mange, “Ning ur pak seni, bel mur baltaum ana Sisar! Anasa tik ning i iaunani mang ai a king, i kutus a warkurai ana Sisar.”†

---

**19:8: 19:8** Matiu 27:12      **19:11: 19:11** Jon 10:18; Aposel 2:23; Rom 13:1      **19:12: 19:12** Luk 23:2; Aposel 17:7      † **19:12: 19:12** A Sisar a tnan ningnigo ana matanitu Rom, pa tarai Israel otleng la kes nahai anuna warkurai. E Pailat i titol ka nahai a Sisar.

<sup>13</sup> Ning e Pailat i longor a warwarala ne, i ben purum pas e Iesu utumo lapiu. Lamur e Pailat i kes ting na keskes a warkurai ting na pukna di atongi ana warwara Hibru mang Gabata, a kamkamna mang di suah alar a kabalapiu ana hatatla.

<sup>14</sup> Ana iahkamis tostos, e Pailat i atai a tarai Juda mange, “Mulo oroi, anumulo a king ma ne.” A utna ne i hanot ana pukakiar na sang, a pukakiar nigo tana pukakiar a lotu na Han Lakai.

<sup>15</sup> A tarai Juda la kukuk mang, “Ben seni! Ben seni! Sai ahati saot na rakai kutus!” E Pailat i deken la mange, “Mulo mang sur ar sai ahat anumulo a king saot na rakai kutus?” A leklek a tena artabarla tetek e God la kelesi mange, “A Sisar sot ka anumila king!”

<sup>16</sup> Pa e Pailat i saran tar e Iesu tetek a tarai a harum, sur lar sai ahati saot na rakai kutus. Pa la ben pas e Iesu.

*Di sai ahat e Iesu saot na rakai kutus  
(Matiu 27:32-44; Mak 15:21-32; Luk 23:26-43)*

<sup>17</sup> E Iesu i pamar pas anuna rakai kutus pa i han uting na pukna ning di atongi “A Lasa na Pukulundi,” ning ana warwara Hibru di atongi e Golgota.

<sup>18</sup> Tingia, la sai ahati saot na rakai kutus. La sai ahat tar otleng naur a barsan taum onoi, ting na naur a ris, pa e Iesu i kulam na arpotor indiau.

<sup>19</sup> Pa e Pailat i tumus a warwara sur dir sai ahati saot na rakai kutus, mange:

E IESU A TE NASARET, A KING ANUNA TARAI JUDA.

<sup>20</sup> A galis a tarai Juda la was a warwara ne, anasa a pukna ning di sai ahah e Iesu ono, i milau ka e Jerusalem, pa di tumus a warwara ne ana natol a ngas a warwara, a warwara Hibru, Latin pa Grik.

<sup>21</sup> A leklek a tena artabarla tetek e God la atai e Pailat mange, “Gong u tumusi mang, ‘a King anuna tarai Juda.’ Ur tumusi ka mang, ‘A barsan ne i iaunani mang ai a king anuna tarai Juda.’ ”

<sup>22</sup> E Pailat i keles la mange, “A warwara ning ia ka tumus tari, ir mang ot larning.”

<sup>23</sup> Ning a tarai a harum la ka sai ahah tar e Iesu saot na rakai kutus, la los pas anuna kaenla ning i polpol alar anuna mermer onoi, pa la asaurani ana diat a tiniba. Ning a tena harum, anuna ning a tiniba. La los pas otleng anuna kaen ning i pipisi. A kaen ning bel ta sunusuk onoi, a kidol a kaen ka.

<sup>24</sup> A tarai a harum la awara artalai la mange, “Gong dala siliri, dalar pilai laki, sur esi na halindala ir losi.” La toli manglarning sur dir tolsot pas a warwara ting na Buk Tabu. I atongi mange,

“La asauran anuk a kaenla onla,  
pa la pilai laki suri.”

*Buk Song 22:18*

A ututnala ne, ning a tarai a harum la toli.

<sup>25</sup> Tana e Iesu i tur milau a rakai kutus ane Iesu, taum oe tasna hane, pa e Maria otleng a hane ane Kilopas, pa e Maria Makdalen.

<sup>26</sup> Ning e Iesu i oroi e tana tingia, dia tur taum ana kaklik asaer ning e Iesu i katnani, i atai e tana mange, “Nana, i ning a natumlik.”

<sup>27</sup> I atai a kaklik asaer otleng mange, “I ning e tnam.” Turpasi ot ana pukakiar ning, a kaklik asaer ning, i ben pas e tana e Iesu, sur ir kes ting na nuna rumai.

### *E Iesu i mat*

*(Matiu 27:45-56; Mak 15:33-41; Luk 23:44-49)*

<sup>28</sup> E Iesu i tasmani mang ka tol arop tar a titolla, pa i atongi mange, “A mos.” I atongi larning, sur ir tolsot pas a warwara ning di ka tumus tari ting na Buk Tabu.

<sup>29</sup> Ning a koto na mititir a wain kaning ia. La los pas ning a utna i sira dop a polo, pa la amurungi ting na koto na wain ning i mititir. La suah pasi ana rakai, di atongi a hisop, pa la tustani usaot sur a pahana e Iesu.

<sup>30</sup> Ning e Iesu ka dop pas a wain, i atongi mang, “Ka rop.” I lugun purum a pukulna, pa i suah sen a malwasna.

### *Di so a kabarangragai e Iesu*

<sup>31</sup> A tarai Juda la nunung e Pailat sur ir malmaling sur dir kuben a handitol, sur ditol ar mat kapit, pa dir los purum a palaonditol kusun natol a rakai kutus, anasa a pukakiar ning, a pukakiar nigo tana tnan Pukakiar Sabat, pa bel la mang sur a palaonditol ir kulam saot na rakai kutus ana Pukakiar Sabat.

<sup>32</sup> Pa tarai a harum la han pa la kuben naur a hana a ningnigo na barsan, pa lamur ning a halindiau kale, ning di sai ahat diau taum oe Iesu ana natol a rakai kutus.

<sup>33</sup> Ika ning la han tetek e Iesu, la oroi mang ka mat, pa bel ma la kuben naur a hana.

<sup>34</sup> Ning a tena harum i so a kabarangragaina ana turai, a suluk taum ana malum i tapek purum kakat kusuni.

<sup>35</sup> A kaklik asaer ning i oroi a ututnala ne, i warwara talapor onoi sur mulo otleng mulor tortorot. A warwara talapor ne i momol, pa i ot i tasmani mang i momol.

<sup>36</sup> Di tol a ututnala ne, sur dir tolsot pas a warwara, ning di ka tumus tari ting na Buk Tabu mange, “Bel dir kuben ta surna.” *Buk Song 34:20*

<sup>37</sup> Di tolsot pas otleng a warwara na Buk Tabu mange, “Lar ngoson esaning la so tari.” *Sekaraia 12:10*

*Di aborbor a minat e Iesu tingui na kulam a minat (Matiu 27:57-61; Mak 15:42-47; Luk 23:50-56)*

<sup>38</sup> Lamur, e Josep a te Arimatia i nunung e Pailat sur a minat e Iesu. I otleng, a kaklik asaer ning i murmur kumnan e Iesu, anasa i matatan a tarai Juda. Pa e Pailat i malmaling sur ir han pa ir pak purum pas a minat e Iesu.

<sup>39</sup> E Nikadimos, ning lanigo i han tetek e Iesu ana ning a morom, i otleng i hanot. I los ning a tomtoboh, ning di toli ana alo pa mira. A mamahat onoi, i arlar ana natol a bonot a kilogrem.

<sup>40</sup> Dia los pas a minat e Iesu, dia irisi ana wakak a kaenla taum ana tomtoboh, arlar ana

toltol anuna tarai Juda, ning la sira toli ana minatla.

<sup>41</sup> Ning a barim kaning milau a pukna ning di sai ahat e Iesu saot ia, pa ning a tona kulam a minat kaning ia, ning belot di aborbor tar ta minat tingia.

<sup>42</sup> Pa la aborbor e Iesu tingui na kulam a minat ning, anasa i milau ka. La toli larning, anasa a pukakiar ning a tarai Juda la sang sur a Pukakiar Sabat.

## 20

*A wah a kulam a minat ane Iesu  
(Matiu 28:1-8; Mak 16:1-8; Luk 24:1-12)*

<sup>1</sup> Ana kobot ning ot ana ningnigo na pukakiar ana wik, kaning ot i mormorom, e Maria Makdalen i hanot ting na kulam a minat. I oroi mang di ka lakir sen tar a tnan hat kusun a taman a kulam a minat.

<sup>2</sup> I dun tetek e Saimon Pita pa kaklik asaer ning e Iesu i katnani, pa i atai diau mange, “Di ka kepsen pas a Leklek kusun a kulam a minat, pa bel mila tasmani di aborbori taha.”

<sup>3</sup> E Pita pa kaklik a asaer ning, dia han sur uting na kulam a minat.

<sup>4</sup> Dia rop dia dun, ika ning a halindiau i dun ot nigo ta e Pita uting na kulam a minat.

<sup>5</sup> I roh purum, pa i sidok pa i oroi a kaenla kaning ia, ika bel i kas.

<sup>6</sup> Ning e Saimon Pita i hanot murmur tana, i kas uting na kulam a minat, pa i oroi a kaenla kama kaning la borbor tar.

<sup>7</sup> Ika a kaen ning di iris tar a pukul e Iesu ono, bel i kes taum on dingla na kaen, di ka hin tari pa di suah masak tari.

<sup>8</sup> Pa kaklik asaer ning i nigo ot tar uting na kulam a minat, i otleng i kas. I oroi pa i tortorot.

<sup>9</sup> Belot dia talapor ana warwara na Buk Tabu mang e Iesu ir kamtur ulak kusun a minat.

<sup>10</sup> Pa naur a kaklik asaer dia ulak sur a hanua.

*E Iesu i hanot tetek e Maria Makdalen  
(Matiu 28:9-10; Mak 16:9-11)*

<sup>11</sup> E Maria Makdalen i tur tumo lapiu na kulam a minat pa i domos. Ning kaning ot i domos, i roh purum pa i sidok uting na kulam a minat.

<sup>12</sup> I oroi pas naur a angelo kaning ia, dia mermer ana kokok a kaenla, pa dia kes ting na pukna ning di aborbor tar a minat e Iesu ono. Ning i kes ting na ululnge, pa ning a halindiau i kes ting na kamkama.

<sup>13</sup> Dia dekeni mange, “Wan, u domos sur asa?” I keles diau mange, “La ka los masak pas anuk a Leklek, pa bel a tasmani la aborbori taha.”

<sup>14</sup> Ning i gilam, i oroi e Iesu kaning i tur tingia, ika bel i oroi lalani mang e Iesu ot ning.

<sup>15</sup> E Iesu i dekeni mange, “Wan, u domos sur asa? U tai sur esi?” E Maria i nuki mang a barsan ning a tena tai alar ana barim, pa i atai i mange, “Lak, ning u los masak pas a minat e Iesu, ur atai iau, u aborbori taha, sur ar han par los pasi.”

<sup>16</sup> E Iesu i kabahi mange, “Maria!” E Maria i gilam teteki pa i kabahi ana warwara Hibru

mange, “Raboni!” a kamkamna mang a Tena Asaer.

<sup>17</sup> E Iesu i atai i mange, “Gong u tong a palaok, anasa belot a han kas usaot tetek e Tata. Ur han tetek na tastsikla, pa ur atai la mang, ar han usaot tetek e Tata pa e Tamamulo, tetek anuk a God pa anumulo a God.”

<sup>18</sup> E Maria Makdalen i han pa i atai a kakak a asaerla mange, “Ia ka oroi tar a Leklek.” Pa i atai la otleng ana warwarala ning e Iesu i atai tari ono.

*E Iesu i turot tetek anuna kakak a asaerla  
(Matiu 28:16-20; Mak 16:14-18; Luk 24:36-49)*

<sup>19</sup> Ana rah morom, ana ningnigo na pukakiar ana wik, a kakak a asaer la kes taum, pa la tagar alar la tingui na rumai, anasa la matatan a tarai Juda. Pa e Iesu i turot na arpotor inla, pa i atai la mange, “A balmolmol tetek mulo.”

<sup>20</sup> Ning ka atong tari lerne, i asangan tar naur a kuna pa kabarangragaina tanla. A kakak a asaerla, la gas kol ning la oroi a Leklek.

<sup>21</sup> E Iesu i atong ulaki tanla mange, “A balmolmol tetek mulo. E Tata i sune iau, mang otleng larning ar sune mulo.”

<sup>22</sup> Ning ka atong tar a warwara ne, i wus a wuwu na pahana onla, pa i atai la mange, “A Talngan Tabu ne, mulor kibasi ting na lalaun anumuloi.

<sup>23</sup> Ning mulor nuk duman sen a toltol laulaula anuna tik, e God otleng ir kepseni kusuni. Ning

bel mulor nuk duman sen a toltol laulau anuna tik, e God otleng bel ir kepseni kusuni.”

### *E Iesu taum oe Tomas*

<sup>24</sup> E Tomas, ning di atongi otleng mang a Kasang, i ning a hala bonot pa pisir naur a kakak a asaerla, bel i kes taum onla ning e Iesu i turot tetek la.

<sup>25</sup> A kakak a asaer la atai i mange, “Mila ka oroi tar a Leklek!” Ika e Tomas i atai la mange, “Ning bel ar oroi tar a ngen a barbar ana naur a kuna pa bel ar subaran tar a pitlai kuk onoi, pa bel ar subaran a kuk ting na kabarangragaina, bel ar tortorot.”

<sup>26</sup> Ning a wik alari, a kakak a asaer la kes taum ulak ting na rumai, la taum oe Tomas. La tagar alar pas la. Ika e Iesu i turot na arpotor inla, pa i atai la mange, “A balmolmol tetek mulo!”

<sup>27</sup> Lamur i atai e Tomas mange, “Subaran a pitlai kum ute, pa ur oroi naur a kuk. Atostos a kum ute, pa ur subarani te na kabarangragaik. Pa gong ma u urmatana nuknuk, ur tortorot ka.”

<sup>28</sup> E Tomas i atai i mange, “Anuk a Leklek pa nuk a God!”

<sup>29</sup> E Iesu i atai i mange, “U bot tortorot anasa u oroi iau. La ning bel la oroi iau pa la tortorot, la angis.”

### *A kamkamna ning di tumus a buk ne*

<sup>30</sup> E Iesu i tol a galis a akinalang otleng na matana anuna kakak a asaerla, ning bel di tumusi te na buk ne.

<sup>31</sup> Ika di tumus pas ka a ututnala ne, sur mulor tortorot mang e Iesu ai a Karisito, a Nat e God. Pa ning mulor tortorot onoi, mulor kibas ot a lalaun ana risana.

## 21

*E Iesu i turot tetek mais a kakak a asaerla*

<sup>1</sup> Lamur e Iesu i turot ulak tetek anuna kakak a asaerla tumo na hang a puka tasi Tiberias. A utna ne i hanot larne:

<sup>2</sup> E Saimon Pita pa e Tomas, esaning di atongi otleng mang a kasang, pa e Natanael a te Kana miting na papar Galili, pa naur a nat e Sebedi, pa naur otleng a hala kakak a asaerla, la kes taum.

<sup>3</sup> Pa e Saimon Pita i atai la mange, “Ar han, ar migen a uben.” La kelesi mange, “Dala taum.” La kas ana mon pa la han. Ika ana morom ning, bel la dat pas ta sis.

<sup>4</sup> Ana kobot ning ot, e Iesu i tur tumokorot latasi, ika a kakak a asaerla bel la oroi lalani mang e Iesu.

<sup>5</sup> Pa e Iesu i deken la mange, “Kakakla, mulo dat pas ot al sis?” La puai mang, “Bel al.”

<sup>6</sup> E Iesu i atai la mange, “Mulor migen a uben ting na ris a sot a kumulo, sur mulor dat pas al sis.” Pa la migeni larning i atai la. Pa la datdat panan a uben, anasa ka bukus ana sista.

<sup>7</sup> A kaklik asaer ning e Iesu i katnani, i atai e Pita mange, “A Leklek ot numo!” Ning e Saimon Pita i longori mang a Leklek, i pipis ulak pas a kaen ning i pak sen tari, pa i sirok uting latasi.

<sup>8</sup> A kakak a asaer la mur ana mon utumo latasi. Pa la dat purum a uben ning i bukus ana sista, anasa bel la kes bakbak kusun a hang, i arlar ka ona takai a mar a mita.

<sup>9</sup> Ning la sot ana mon, la oroi a barang a iah taum ana sista kaning onoi, pa la oroi otleng a bretla.

<sup>10</sup> E Iesu i atai la mange, “Mulor los al sis ute miting na sista ning nokane mulo uben pasi.”

<sup>11</sup> Pa e Pita i kas ana mon, pa i dat purum a uben utumo latasi. I bukus ana tatatnan sis, a wawas onla i arlar ana takai a mar dilima na bonot pa pisir natol (153). La galis kol, ika a uben bel i taksilir.

<sup>12</sup> E Iesu i atai la mange, “Mulo han ute pa mulor hangan.” Bel tik tagun anuna kakak a asaerla i tolsot sur ir dekeni mang, “U esi?” La ka tasmani mang a Leklek ot ning.

<sup>13</sup> E Iesu i los pas a bret pa i tabar la ono, pa lamur i tabar la kale ana sis.

<sup>14</sup> Ine a munatol a tinanot ane Iesu tetek anuna kakak a asaerla lamur tana kamkamtur anunai kusun a minat.

### *E Iesu i wunan e Pita*

<sup>15</sup> Ning la ka hangan pas, e Iesu i deken e Saimon Pita mange, “Saimon, nat e Jon, u mang kol sur iau tanla ne?” I kelesi mange, “Momol, Leklek, u tasmani mang a mang sur u.” E Iesu i atai i mange, “Ur tabar anuk na tona sipsipla.”

<sup>16</sup> E Iesu i deken ulaki mange, “Saimon, nat e Jon, u mang kol sur iau?” I kelesi mange,

“Momol, Leklek, u tasmani mang a mang sur u.”  
E Iesu i atai i mange, “Ur tai alar anuk na sipsip.”

<sup>17</sup> Munatol onoi e Iesu i dekeni mange,  
“Saimon, nat e Jon, u mang sur iau?” E Pita i nuk  
lingiri, anasa e Iesu ka dekeni munatol mang, “U  
mang sur iau?” I atai i mange, “Leklek, u tasman  
a ututnala rop. U tasmani mang a mang sur u.”  
E Iesu i atai i mange, “Ur tabar anuk na sipsip.

<sup>18</sup> “A atong momoli tam, ning u barman, u ot u  
amermer pas u, pa u han ting na pukna ning u  
mang sur ur han ia. Ika ning u ka bun, ur atostos  
naur a kum, pa tik ot ir amermer u, pa ir ben u  
ting na pukna ning bel u mang sur ur han ia.”

<sup>19</sup> E Iesu i atongi larne, sur ir aslang a ngas a  
hinirua ning ir kibas e Pita. Ana nuna hinirua  
ning ir aleklek e God. Lamur i atai i mange, “Ur  
mur iau.”

### *E Pita i deken e Iesu oe Jon*

<sup>20</sup> E Pita i talingir pa i oroi a kaklik asaer ning  
e Iesu i katnani kaning i mur diau. Esaning i tan  
tar oe Iesu ning la ka hangan, pa i deken e Iesu  
mange, “Leklek, esi ma ir saran tar u uting na  
kuna hiruala?”

<sup>21</sup> Ning e Pita i oroi, i deken e Iesu mange,  
“Leklek, mangmangasa ma a barsan ne?”

<sup>22</sup> E Iesu i kelesi mange, “Ning a mang sur ir  
laun tuk ning ar ulak, bel a utna anumi. Ika u, ur  
mur iau.”

<sup>23</sup> A warwara ne, i kamkamna sur ning a  
warwara otleng i han sarara tetek la ning la  
tortorot, mang a kaklik asaer ne bel ir mat. Ika e

Iesu bel i atongi mang bel ir mat, i atongi ka mange, “Ning a mang sur ir laun tuk ning ar ulak, bel a utna anumi.”

<sup>24</sup> Ine a kaklik asaer, ning i warwara talapor ana ututnala ne, pa i tumus akesi. Pa dala tasmani mang anuna warwara talapor, i momol kol.

<sup>25</sup> E Iesu ka tol tar a galis a ututnala otleng. Ning dir tumus arop la, a nuki mang a rakrakan hanua bel i itna sur dir suah a bukla rop onoi.

**A Wakak a Warwara ane God**  
**The New Testament in the Label language of Papua**  
**New Guinea**  
**Nupela Testamen long tokples Label long Niugini**

copyright © 2023 Wycliffe Bible Translators Australia

Language: Label

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-02-02

---

PDF generated using Haiola and XeLaTeX on 11 Mar 2026 from source files dated 2 Feb 2026

13fa0832-6e31-5347-b6eb-57b79224ca94